


KATAACILU KÀÀ MUNTU

UDI WELA MEEJI

 Twasàkidila, Mwanèètù Mann. Ndi mumòne nè udi mutwàle mwanèètù wa balùme kampànda. Mukalenge àkubènèshè.

Bintu byònsò bìdi mwà kwenzeka, itàbùùjà nàka.

Tùsambilàayi.

Éyì Nzambì, bulelèlà ki cìdì dijinga dyà mwoyi wètù dilòòlò edi, ng'ànu bwà kwitabuujà cyanàànà. Bu mutùdì badìsangìshe kaaba aka dilòòlò edi mu tabernacle emu, díbà dyènda díbwela ku wesètè, tudi tulòmba, Nzambì munanga, bwà wátùfikishakù ku dijingulula mùshindù ùdìbi bitàmbe kuseemena nè mùdì díbà munkaci mwà kubwela kàbìdì pa cikondo; cìdì munkaci mwà kujika. Ditùkù ndiyè bikolè. Nè tudi tuvùluka musangu kampànda ùvwà ditùkù diyè bikolè, beena lwendu bàbìdì kuKubiikilabò bwà kubwela nè kushààla naabò. Nè pashìishe Wèwè kuDìmanyisha kùdìbo mu kuumvwija Dìyì Dyèbè nè kubàfikisha ku dimòna mùvwà Kilistò nè cyà kukenga, mu bintu byònsò ebi dyàmbedi.

² Pa nànkù tudi tulòmba, Nzambì, bu mùdì ditùkù diyè bikolè, bwà Ùbwelè mu nzùbu yètù nè wikalè neetù, nè ùtuumvwije Dìyì, Mukalenge, ditùdì bakwàte nè ngàsà yònsò bu bubanji bwà Kùdì, bu dipà munda mwà mwoyi wètù. Swàkù bwà katùDìsambùkùku to; swàkù bwà tùDìneemèkè bikolè misangu yònsò nè myoyi yètù yònsò.

³ Tudi tuKusàkidila bwà cyÙvwà mwenzèle aba bàdì mu lùpitaadì mu dindà emu abu, nè ciWàkenzelà mwànà mukesè wa balùme wa Mwanèètù Capps uvwa mulàadika mwaba awu, wàmba kufwà, nènku mpindyewu ki yèyè ewu mu batèeleji emu dilòòlò edi. Mùshindù mwinè utùdì tuKusàkidila, Taatù, bwà bintu byònsò ebi's wè!

⁴ Enzàku, Mukalenge, bwà twamònakù mwà kumanya mùvwàbì bikèngela bwà twètù kuKupà butùmbi. Tudi ànu . . . Ncipite cyumvwilu cyètù bwà kumanya mwà kuKupà butùmbi. Kàdì, Mukalenge, akidilàku myoyi yètù bu bimanyinu byà disàkidila, bwà ne tudi baKunangè. Nènku patùdì—tùdì baswè kwenza cìdì cyakàne, tùleejekù cyà dyenza. Tudi tulòmba mu Dìna dyà Yesù. Amen.

Nudi mwà kusòmbaayi.

⁵ Dilòòlò dilenga kùdi èkèleeziyà munène ewu udi mupàte patapata dilòòlò edi nè pambèlu mu ditùnga dijimà ku matèlèfònè. Bàdi bàmba nè bàdi neetù ku nshinga dilòòlò edi.

Ndi ntèkemena nè mukàjàànyì ùdi munkaci mwà kutèeleja. Ncivwa mufikè ku dimubiikila to, pa nàнку nèmubiiikilè paanyimà pàà disangisha edi.

⁶ Kàdi tudi bapetè kabèji mwab'ewu mu dindà emu nè mwanààb-... nè Mwanèètù Jackson anyì tatwèndè uvwa mu ngiikàdilù wa bwalu bukolè awu, nè disànguluka ndyenzèke mu mùshindù wà nè, mmufwànyine kufika ku dyalukila kumbèlu mààlabà.

⁷ Mwànà mukesè wa balùme wa Mwanèètù Capps, uvwayè mumbiiikidile dilòòlò adi awu, Ncyèna mumanyè nè Mwanèètù Capps ùdi mu batèeleji emu anyì to, kàdi, nè mwanèndè mukesè wa balùme awu ùvwa ùsaama bikolè be.

Kàdi kwenzekabi nè Joseph nè mèmè tuvwa bapweke ku—ku dyasa dyà nyama mu mpàta, munkaci mwà kulongolola cingoma cyànyì cikesè cyà kàlibrè .22 aci. Mvwa munwambile nwènù bônso bwalu ebu lumingu lwàshààdi elu. Nènku yèyè neikalè mwashi wa dipòkò. Nè pa nàнку ùvwa muswè kwikala mutwishiiibwe bwà kwambila Gary nè Larry cyàkenzàye aci. Ki kungambilayè, mu dyalukila. . . Mèmè nè: “Bivwa bikèngela wèwè kwimanamù nè—nè kwambila Mwanèètù Gene Norman bwalu abu.”

Kwambayè nè: “Anji indilà wàmbile Billy dyàmbedi,” mwanààbò wa balùme.

Paanyimà pàà mumuleeje nyama mîmpè yìvwàye mwàsè, kwambayè nè: “Mpindyewu wamanya kùndamàkàji to.” Nwamònu anyì?

⁸ Nènku tudi benzè ànu tufika kuntwaku anyì, mònà's, tèlefonè kudilayè, ki Billy kubwelayè lùbilu bwà kukonka. . . Mèmè kwamba nè: “Cidi mwà kwikala dibiiikila dyà mubèedi kampànda mpindyewu.” Ki twètù kubwela ànu cyanààna, nè ùvwa m'Mwanèètù Capps. Nènku mwànà mukesè wa balùme awu ùvwa nè disaamà dyà mulàkà, nènku kumushààdile ànu kaamundidimbì kakesè kàà mpungà wa kushààla nè mwoyi. Kàdi Mukalenge kumwondopayè. Ki dilòòlò adi kwambayè nè ùdi ùsaama disaamà dyà mùshindù kampànda, m'Màndàmù Wood ùvwa ùngambila awu. Nènku tuvwa tuumuka mu dilwijakaja, nènku mvwa ànu. . . Mèmè kwamba nè: Màndamu Wood, dîbà dikaadi diyè mpindyewu, dîbà dikumi jaajaaja, ndi ngèèla mpata bwà nè bôbò nebàkubweje mu lùpitaadi mwàmwa's.” Mèmè kwamba nè: Ndi ngàalukila kumbèlu bwà kukànga ànu ciibi.” Ki mèmè kuya kasambila. Nènku bàdi bàmba nè mwànà mukesè wa balùme awu ùdi mu batèeleji emu dilòòlò edi. Pa nàнку tudi nè kusàkidila kwàbùngì bwà bwalu abu. Nènku tudi nè kusàkidila.

⁹ Mpindyewu tudi ànu kacya twakwàta; katwèna bânji kuumvwa to. Bu Mwanèètù Leo Mercier nè Mwanèètù wa bakàji Mercier mwà kwikala munkaci mwà kutèèleja, katwèna bânji kuumvwa bwalu bwà kùdi tatwèbè to. Tudi batèkèmène bwà kupeta mulubù mu katanci kakesè emu, wà mùdiye wùdyumvwa. Kàdi ndi mutwìshìibwe nè yèyè neàsangalè, pa nàнку bwà aci tudi tweyemena Nzambi wa Bukolè bwònsò, bwà nè Nzambi neàtabaleelè munanga awu, munsantu wa kale awu, mwambi nkòlomò wa kale wa Èvànjeeliyò awu.

¹⁰ Mpindyewu, kaa, kùdi bintu búngi cyanààna bìdì bikèngelà kwenza, nè katanci kîpì nùнку kàà kubyèna, pa nàнку tutekàayi ànu makànda ètù ònsò mpindyewu mu citùdi mwà kwenza bwà Mukalenge wetù.

¹¹ Ndi mulwè kumpàla kwà díbà ndambù. Nè ncìvwa—ncìvwa mudyumvwe bímpè bitàmbidile to. Ndi mucyòke, mucyòke ànu bikolè, nè ndi mudyàdije pashì mu mapingaja emu. Kacya . . . Neyèna nànsha mwanji kudyà didyà dyà mundaamuunyà to. Ki mèmè—mèmè kubwela, kushààla ànu mudyàdije pashì mu mapingaja mwònsò amu. Mèmè kudyumvwa bibi be, ki mèmè kushààla mulààle mwaba awu. Ki díbà adi mèmè kudítwa mu disambila, ki mèmè kudyumvwa bímpè bitàmbe. Ki mèmè kulàndapuka, kuvwàla bilàmbà, nè kulwa mu èkèleeziyà.

¹² Pa nàнку tudi—tudi tweyemena Mukalenge Yesù mpindyewu bwà nè Yèyè neàbeneshè didìfilà dyètù pàmwè dilòòlò edi, bu mùdibi nè mu ditùnga dijimà tudi tuteeta bwà kulenga citùpà cyà Mubidi wà Kilistò eci, cìndi mupèeshìibwe bukenji bwà kudiisha mikòòkò Yèndè. Nèнку mvwa njinga ànu kwenza bilondèshile dyànyi dimanya dyònsò ndíndi naadi, mu kufila kwà Cyàkudyà cijaalàme cìndi pàanyi mumanyè bwà mikòòkò.

Nèнку ndi mwindile nè mwoyi ùzùka bwà díbà ditwikalà mwà kutwilangana bònsò mu mwaba ùmwè nè kuyiisha pa Bipùpù Mwandamutekète abi, nè Mpànzà Mwandamutekète ayi, nè Mpungi, nè bikwàbò. Byònsò abi bìdì byènzeka ànu mu kasumbù bilondangana. Ki bwà cinyi nebitwangatè bu lumingu lujimà nàнку awu, matùkù dikùmi anyi mapite apu, bwà kujikija bwalu bwabi mu disangisha dimwèpelè, bu twètù mwà kupeta mùshindù. Ndi ngèèla meeji nè mbikùmbàne.

¹³ Mpindyewu, bààbúngi bàà kunùdì bàdi bènza lwendu lwà ntàntà mule. Ndi ntàngila mwab'ewu, nè ndi mfùma ku dimòna, kwènji katanci, bantu bàà mu Tucson. Màndàmù Sothmann, ndi mmòna Mwanèètù Fred mufikè bímpè. Mvwa mumumòne mu batèèleji mu dindà emu. Nèнку wàwa nàka ngèèla meeji nè m'Mwanèètù Don Ruddell udi musòmbe ku luseke lwèndè lwà paanyimà pàapa, dilòòlò edi. Ndi nè disànka dyà kumòna Mwanèètù Don munda emu. Nè Junior, Junior ùdi kaaba aka anyi, anyi ùdi ku èkèleeziyà wèndè? Ngèèla meeji nè bàdi ku maatèlèfonè mu èkèleeziyà dilòòlò edi.

Pa nàнку, nwènù bânà bèètù bônso, tudi nè disànkà dyàbùngì bwà kwikala kwènù neetù kaaba aka dilòòlò edi, nè tweyemena Mukalenge nè dîngà ditùkù twètù, pìikalà ditùkù dyà mwoyi wà pànu dimanè kujika nè bwètù bukènkè bukesè bwà mwoyi wà cifwàkà bùbanga kubwucidila nè bwènda bùjima, katwàkuciina bubì nànsha bùmwe to, bwalu mu—mu . . .

¹⁴ Ndi mfùma ku dinùpetela mulubù, wà mu—wà ku . . . mu Arizona mwàmwa, lwà ku Prescott. Mwanèètù Coggins wapàtukù mu lùpitaadi. Pa nàнку tudi nè kusàkidila kwàbùngì bwà bwalu abu. Bìmpè. Abi's mbìmpè. Pa nàнку tudi nè kusàkidila kwàbùngì bwà bwalu abu. Mwanèètù wa bakàjì Mercier, papa wèbè ùdi munkaci mwà kuumvwa bìmpè mpindyewu. Mvwa ànu mùmvwè, paanyimà pàà twètù bamanè kusambila, nè yèyè ùvwa mwà kwikala bìmpè. Pa nàнку bàdi mwà kwikala bàteeleja ku nshinga; ndi ntèkemena nè bàdi ku nshinga; nènku ndi ngèèla meeji nè bàdikù. Pa nàнку tudi nè kusàkidila kwàbùngì bwà bwalu abu, bwà nè mwanèètù wa balùme ùdi—ùdi bìmpè mpindyewu, nè yèyè neàsangalè. Pa nàнку tudi twela Mukalenge twasàkidila bwà bintu byónso ebi.

¹⁵ Mvwa mupetè dilòmba makèèlèlè dilòòlò awu; mwanèètù wa balùme munanga kaaba aka, ngèèla meeji nè yèyè ùdi mwà kwikala kàyì neetù leelù ewu to. Mwanèètù wa balùme kampànda wa ku Kentucky kwàka, ùvwa mumbiikile bwà mwanèndè wa bakàjì. Dìkù dyà musàngeelù, kàdi mwànà wa—wa bakàjì awu ùdi nè cyà kupicila ku keelè, maamù mutekète nè kànsèrè mu mwongo. Pa nàнку tudi—tudi tulòmba bwà Nzambi àsungile mukàjì mutekète ewu. Ndi ngiitabuuja nè Yèyè neàmusingilè, bu twètù ànu mwà . . .

Disangisha, twètù bônso cyàpàmwe, kuswikakana mu disambila bwà bantu aba, bônso cyàpàmwe. Ki citùdi nè cyà kwenza ncyòci aci, badyènzè cimùkù. Bu . . .

¹⁶ Nènku bu mùdi matùkù ènda àtamba kuseemena ànu kuseemena, nè dibùlakana dyà kajila, twètù—twètù tudi baswè kutàmba kutwìlangana cyàpàmwe. Ekèlekèle, tudi nè cyà kwikala ànu wumwe, mubidi wùmwe. Tudi nè cyà kwendela pàmwe, tupwà mwoyi mpèkaatù yà muntu nè mukwèndè nè dishiilàngana dyètù, nè twenda ànu tutàmba kulamakanangana ànu kulamàkanangana, bu mutùdi tumòna Ditùkù adi dyènda dìseemena. Tudisangishakù pàmwe, bônso nè dìyì òmwè nè mwoyi wùmwe. Nènku mwanèètù wa balùme, mwanèètù wa bakàjì yèyè mupàtuke mu njila, mu mùshindù kanà wónso, kwenjìkù cintu nànsha cimwè to pa kuumusha kusambidila muntu awu, nè mu dinanga, biikàle misangu yónso ànu nutwàngana mushinga muntu nè mukwèndè. Kanù—kanùlekedikù muntu nànsha umwe wa kunùdi ùpàmbuka to. Shààlaayi pàmwe. Nènku, nwènù mwà kushààla nàнку, kusàkidilakù bààbùngì, ku musangu nè ku musangu, misangu yónso.

¹⁷ Mwanèètù Neville, ndi nè dilòmba dyèbè mwab'ewu bwà Mwanèètù Wright, Mwanèètù George Wright udi musòmbe apa ewu. Tudi nè disànkà mùdì Mwanèètù wa balùme Wright nè Mwanèètù wa bakàjì Wright, kaaba aka . . . Edith mwànà, ndi . . . Dìngà ditùkù patùdì tulwa, tudi baswè kwenza kaadisangisha kakesè kàà civulukilu kaaba aka.

Ncivwa mwalùkile bwà Edith dîbà dyàkayàyi adi to. Kàdi, Mwanèètù wa bakàjì Wright, udi muvùlùke cilòòtà civwàye mupetè kùkaadi bidimu bu bibidì nànkù awu. Ki mèmè kunwambila dîbà adi, mèmè kwamba nè: “Cìdi nè, Edith mwànà ewu kàakushàalakù neetù ntàntà mule menemene mpindyewu to,” bwalu Mukalenge ùkaavwa mumanè kwamba nè ùvwa uya, kupicila ku cilòòtà civwàye mulòte aci. Ki mèmè kupeta dyumvwija dyàcì, divwa nè, yèyè ùvwa nè cyà kukatuutakeena nè Nzambi. Paanyimà pàà bidimu bitwè ku bibidì, kuyayè bwà katuutakeena nè Nzambi. Mpindyewu mwindile bwà papa wendè nè maman wendè kusambukabò mulongo wùdì wùtápululà awu, pankaci pàà cifwàkà nè dibènga kufwà.

¹⁸ Nzambi ànùbènèshè. Ndi muswè kuteeta bwà kukumòna ànu mu mutanci mukesè emu, bu mèmè mwà kupeta mpùngà. Pa nànkù Nzambi ìkalèku neenù nè Shelby, nè bantu bònsò. Mvwa ngèèla meeji nè mvwa mumòne Shelby mu dindà emu; ncivwa mutwishiiibwe to.

Kwènà mwà kutàmba kumòna kumpàlà eku bìmpè to; plafond mmupwèkè mùshindù ewu, nè ùdì ùtangalaja bukènkè kampànda—kampànda mùshindù ewu. Nudi mwà kumòna myaba ayi, kàdi kanùyì mwà kumòna bantu bìmpè menemene to.

¹⁹ Mpindyewu tùyaayi buludi ku Mukenji. Eci m'Mukenji wùndì muswè kubala mu Nombà 19.9 nè mu Efèsò 5.26. Nènku panwikalà nwènù bantu bàdì bàfùnda byena-bwalu nè bikwàbò, mòna's, nudi mwà kubifùnda.

²⁰ Nènku mpindyewu vùlukàayi nè, eci cyòcì munkaci mwà dikwaciibwa pa mikàbà yà mèyì . . . Ncyèna mumanyè to. Ncyèna mwà kumòna muntu to. Èyowà, ndi mmòna cyà bushwà Mwanèètù Terry lwà mu—mu cibambalu cyà dikwàta dyà mikàbà yà mèyì mwàmwa. Nènku piikalà eci munkaci mwà dikwaciibwa pa mukàbà wà mèyì; kùdì bambi kanà bònsò bàà mu myaba kanà yònsò, mu dîbà kanà dyònsò, eci kî nciludikila mu dibùlà dyà kaneemu ku malongesha ènù to, eci kî nciludikila nànsha mikòòkò yèbè to. Mukenji ewu, nè mikwàbò yònsò yà ku Mikenji yìndì ngàakulapù eyi, mbiludikila buludi disangisha dyànyì. Kî mbwà disangisha dyènù to ambà ànu bòbò baswè kuCyàkidila. Kàdi nCiludikila bantu bàdì kaaba aka aba.

²¹ Bantu bàtu bàsùmba mikàbà yà mèyì eyi. Bantu bàà pa buloba bujimà bàtu bàyisùmba nè bàyèla ku cisanjì. Misangu yàbùngì bàtu bàmfùndila. Nè ntu misangu yònsò ànu mbàmbila,

piikalàbo cidimba cyà èkèleeziyà kampànda nè: “Mònangana nè mpaasàtà webè.”

²² Mpindyewu, mpaasàtà, ndi muswè nùmanyè aci, nè, eci cidi ànu bwà disangisha dyànyì nkàâyadi dindì ngàmbila maalu aa. Nè mèmè ndi nè bukenji bwà kwenza nàнку, bwalu ndi mutèèkùibwe kùdi Nyumà Mwîmpè bwà kutàbaleela mìkòòkò eyi. Nènku dyàkabi dyànyì mèmè nciyì mbambila cîndi mèmè ngèèla meeji nè ki Bulelèlè to, nè mùshindù wùndi ngèèla meeji nè ngùlwalwàBù. Kàdi Kacyèna bwà bàà pa buloba anyi bwà bakwàbò bàà mu maèkèleeziyà to. Udi wenza cyònsò cidi Nzambì ùkwambila bwà kwenza aci. Ncyèna mwà kulumbulula bwèbè to, kumyèna mwà kulumbulula bwànyì to. Kàdi tudi nè cyà kulumbulula muntu nè muntu kumpàlà kwà Nzambì, bwà mudimu wètù wà bwambi. Ki bwà cinyì, piikalàbi nè bìdi bikèngela bwà mèmè kulumbulula bwà mudimu wanyì wà bwambi, ndi nè cyà kuBùyiisha mu mùshindù wùndi mBùmòna awu, mu mùshindù ùdiBu bumbulwila awu. Pa nàнку aci cìmanyiibwe mpindyewu.

²³ Mpindyewu mu Nombà 19.9, tudi baswè kubala cyena-bwalu eci, anyì Mufundu ewu's wè, èyowà.

Nè muntu udi mukezùke neàsangishè butù bwà ngombe wa lukungùlù, nènku neabutèèkè pambèlù pàà citùdilu mu mwaba mukezùke, nè nèbùlamùbwe bwà disangisha... (tàngilàayi mpindyewu) bwà disangisha dyà bàna bàà Izàlèlèlà bu màyi à ditàpulula: ndikezudiibwa bwà mpèkaatù.

²⁴ Mònaayi nè, kí nkùdi bantu bònsò to, “kùdi disangisha dyà bàna bàà Izàlèlèlà; màyi à ditàpulula.”

Mpindyewu mu Efèsò, nshapità mwi5, nènku tubangila ku mvensà wa 22.

Bakàji, kòòkelàayi baabàyènu, bu munùdi nukòòkelà Mukalenge.

Bwalu mulùme ùdi mfùmù wa mukàjèndè, ànu mùdi Kilistò mwikàle mfùmù wa èkèleeziyà amu: nè yèyè ùdi musùngidi wa mubidi.

Ki bwà cinyì ànu mùdi èkèleeziyà mu bukòòkeshi bwà Kilistò, pa nàнку bakàji bàkòòkelè baabàyabò mu cintu cyònsò.

Balùme, nùnangàayi bakàji bèènu, ànu mùvwà Kilistò munangè èkèleeziyà amu, nè mudifile yèyè mwìnè bwà bwalu bwèndè;

Mpindyewu cîndi muswe kwamba ncyòci eci mpindyewu.

Bwà wàmòna mwà kumujidila nè kumusukula nè dyowesha dyà màyi ku diyì,

25 Mpindyewu, kaacyena-bwalu kakesè aka dilòlò edi, bu mèmè mwà kukiinyika nè ncyena-bwalu. Nènku ndi ntèkemenà nè bantu bàdì mwab'ewu aba, kàbìdì nè bàdì pambèlu bàlondela ku tèlèfonè abu, kàbàakubùla kaneemu ku cyòcì eci nè kwela meeji nè ncyambiibwe mu mùshindù kampànda wà dinyangakaja cijila to. Nànsha nànkù, bwà kwangata cyena-bwalu bu eci, ncifwanyine kumweka bu cyà cinyangakaja cijila. Cyena-bwalu cìndi ngàngata dilòlò edi cidi nè: *Kataacilu Kàà Muntu Udi Wela Meeji*. Aci's cidi cyumwika cyà dyumisha dyà maalu bu cyena-bwalu, bwà mwambi udi ùkàndameena bikolè kunwà kwà mfwankà, mufwànyine kwangata cyena-bwalu cyà mùshindù awu, *Kataacilu Kàà Muntu Udi Wela Meeji*. Kwenzekabi, nè, dindà adi pàmvwà muyè kalemba nshindi.

26 Bu nwènù bàdì pambèlu ku—ku tudyòmbà, mu lupeepèlè, anyi ku tèlèfonè, nwikala bamòne cilunji pa mpàlà pàà disangisha edi dībà dingàmanyishì cyena-bwalu cyànyì, nùnkù's mbinùsekèsha. *Kataacilu Kàà Muntu Udi Wela Meeji*.

27 Èè, byàkenzekela byònsò mwaba wùvwà Banjèlò bàà Mukalenge bammwènèkèle mu dindà kampànda, nè nshindi ayi yàkafùkiibwà. Nwènù bònsò nudi bavùlùke pààkenzekàci. Nènku, kàbìdì, ànu lwà ku lusongo lwà kakùnà kùmvwà mwimàne aku, kùvwà...ànu bangabanga menemene nè kuyiisha Bikondo Mwandamutekètè byà Èkèleeziyà, muye kalemba mu dindà kampànda kumpàlà kwà butùkù kucyàbu. Kùvwà kwimàne...Mèmè kudyàmbidila nè dībà òvwà dipàtuka, twipacila ku dībà inaayi jaajaaja wa dindà. Mu mùshindù wà pabwàwù; mèmè kumòna Bukènkè abu, ki mèmè kukùdimuka, nènku ke Bitèèkedi byà myèndù byà Ngòlò Mwandamutekètè ebi bisanganyibwa mwaba awu biimàne ku lusongo lwà kakùnà aku, nè cintu cyènzè bu mwanzankòngòlò munkaci mwà kubànda ùpicila mu mbungulu ùtangalaka.

28 Dyàkàmwè paanyimà pàà cyòcì aci, Mukalenge Yesù kutùmwènèkela. Nènku ànu dībà adi mene mèmè kuumvwa Diyì dyàmbe nè: “Yèhowàh wa Dipungila Dikùlukulu n'Yesù wa Dipyadipyà.” Nènku ki Yèyè awu mwaba awu, paanyimà pàà katanci, mubuulùdiibwe paanyimà pàà Bitèèkedi byà myèndù byà Ngòlò Mwandamutekètè abi. Dībà adi mònaayi aci. Mbanganyì bàdì bavùlùke cyena-bwalu aci? Mèmè è kucifùnda paanyimà pàà—pàà cizubu cyà—cyà mitèlèngà cìmvwà naaci mu cibòmbì. “Yèhowàh wa Dipungila Dikùlukulu n'Yesù wa Dipyadipyà.” Nzambi mu Dyulu mmumanyè nè aci civwa cilelèlà.

29 Pangàkasambukà mwaba ùvwàYe mummwènèkèle matùkù makesè, bwà bwalu bwà nshindi.

30 Pashiishe pangàakabiikila mulunda wanyì mulenga, Jack Moore, paanyimà pàà ndambù wa ngondo, bwà kukonka; pangàakabanga kuyiisha Bikondo Mwandamutekètè byà

Èkèleeziyà, Bwàkabuulwibwà 1. Nènku Yèyè ùvwa mwimàne, mutòòke mubidi mujimà; nsukì Yèndè yìvwà bu myòsà yà mùkòòkò. Mmunyi mùvwàYe mwà kwikala, mucìikàle nè bidimu makùmi àsàtù nè bisàtù, kàdi mwikàle nsukì yònsò mitòòke tòò? Nènku Mwanèètù Moore, muntu wa maalu malenga wa dikèma, mushidimùke, mwena Kilistò, nè mumanyi wa dibàla, umwe wa ku bāndi pàànyi mumanye; ki yèyè nè: “Mwanèètù Branham, awu ùvwa n’Yesù paanyimà pàa ngiikādìlù Wendè mutùmbìshìibwe awu. Ki mùshindù wùdìYe ùmwènèka mpindyewu.” Kàdi aci kacỳàkuumvwika bimpè kùndi to. Ki mémè kutùngunuka ànu nè kusambila too nè ditùkù kampànda . . .

³¹ Kumpàlà kwà mémè kubanga Bikondo Mwandamutekètè byà Èkèleeziyà, ncìvwa mwà kululamija nshapità 1 awu bimpè to. Mmunyi mùvwàku Muntu, wa bidimu makùmi àsàtù nè bisàtù, mubiishìibwe ku lufù mu mubidi wùmwèwùmwè wùvwà bàpostòlò baMujingùlwile awu, bamumanyè nè ùvwa Yèyè awu; nè mmùshindù kaayi ùvwàYe mwà kwikala mùkùlākàje mùshindù awu, pām wāpa nè bidimu makumi mwandamukùlù anyi makumi citèemà, nè myòsà mitòòke kwìsù Kwèndè, nè mwedi Wèndè mutòòke bu nèjè?

³² Mvwa mubalè mu Mukàndà wà . . . wà Danyèlè, mwàkalwàye kùdì “Mukùlùmpile Matùkù, Uvwa nè nsukì mitòòke bu myòsà yà mùkòòkò.” Pashiishe mémè è kumòna Mukùlùmpile Matùkù awu. Yèyè ùvwa Mukùlùmpile Matùkù awu, umweumwe awu makèlèlèlè, leelù, too nè kashidi. Nwamònu’s, cìvwa cimfwànyi, dibà adi.

Bwà cinyi myòsà yà mùkòòkò mitòòke? Nènku pashiishe mémè . . . Nyumà Mwìmpè ùvwa ùmwèka bu udi wakula naanyi bwà cimfwànyi cìmvwà mumòne musangu kampànda, cyà mulumbulwishi wa kale. Pashiishe mémè kuya ku bwalu-bulonda; mémè kwalukila mu bwalu-bulonda bwà Bible nè byònsò, bwà kujandula. Nènku banzujì bàà kale, bu mwakwidi munène mu Izàlèlèlè, bìvwà bikèngela ikalè nè nsukì mitòòke, myòsà yà mùkòòkò ku yà mvya bu mùdì nsukì nè mwedi, bwalu citòòke cìvwà ku mutù kwèndè aku cìvwa cyùmvwija nè yèyè ùvwa bukòòkeshi bwà ku mutù kwà balumbulwishi mu Izàlèlèlè.

Nènku nànsha leelù ewu, nè kupweka kùkaadi nkàmà mikesè yà bidimu, pām wāpa kùkaadi bidimu nkàmà yìbidì, anyi pām wāpa kabiyì mùshindù awu to, kàdi pashiishe kupita apu. Balumbulwishi bònsò bàà mu Angleterre, nànsha bòbò bansongà bishi anyi bòbò biikàle banunu bàà mùshindù kaayi, pāv wābo bàbwela bwà kulumbulwisha, bàvwa bàvwàla kafulu kàà nsukì mitòòke; nènku mbwà kuleeja nè kakwèna bukòòkeshi bukwàbò nànsha bùm wè to, mu bukalenge abu, kumutù kwà díyì dyàbò. Díyì dyàbò ki nkàmisha wa mu bukalenge. Cidìbo bàmba aci, ke cyònsò cidìku.

³³ Nènku mpindyewu, díbà adi, mèmè kumòna aci. Ki Yèyè awu mwimàne mwaba awu, mucíkàlè ànu Nsongààlùmè, kàdi nè kafulu kàà nsuki mitòòke aku. Yèyè nguvwa Mukookeshi mu kaabujima, wa kumutù kwà bònsò. Yèyè ùvwa Dìyi. Nè Yèyè mwine ùdi nè, muvwàlè kafulu kàà nsuki mitòòke.

³⁴ Pashiishe, díbà adi patwàjikìjì, nè—nè diyisha adi, nè twètù kupàtuka kuya ku wesètè, kàdi pàakamwènekà Banjèlò bàà Mukalenge kuntwaku bwà Bitampì Mwandamutèkète, nè cyòci kubànda muulu mu mpeepèlè (cyena fòtò waci utùdi nèndè mwab'ewu, nè mu ditùnga dijimà emu), ki Yèyè awu mwimàne mwaba awu, mucìikale ànu muvwàlè kafulu kàà nsuki mitòòke kàà bukòòkeshi bwà ku mutù abu. Yèyè ki Mutù wà Èkèlèeziyà. Yèyè ki Mutù wà Mubidi. Kakwèna cintu nànsha cìmwè bu Yèyè to, mwaba nànsha wùmwè. “Wàkenza bintu byònsò ku Yèyè mwinè. Wàkenza bintu byònsò Bwèndè Yèyè mwinè, nè pa kuumusha Yèyè kakùvwa cintu nànsha cìmwè cyenjìibwe to.” “Yèyè ùdi nè bukòòkeshi bwònsò mu Maulu nè pa buloba,” nè bintu byònsò mbyèndè Yèyè. “Nè munda Mwèndè mmudi musòmbèlè kaabujimà kàà Bunzambi mu ciikadilu cyà mubidi.” “Nè Dìyi dyàkadi Nzambì, nè dyàkavwijìibwa mubidi munkaci mwètù.” Nè Yèyè ki Ewu Wàkabaulula bwalu busokoka bwònsò nkòòng bwà ndongamu mujimà wa lupàndu, uvwa baprófetà bònsò nè beena meeji baakùlè awu. Yèyè nkààayèndè awu ki Ewu uvwa mulwàtè kafulu katòòke kàà Bukòòkeshi bwà ku mutù abu aku.

³⁵ Mpindyewu, mvwa mwimàne, pa kakùnà apu dindà adi, bìvwa bìmwèka bu nè kùvwa ndambù wa nshìndi munkaci mwà kunàya kuulu aku. Ki mèmè kubanga kusòmba panshì. Mèmè kushààla mwaba awu katanci, díbà adi, bisuku kundaababi, nènku mulùmýànà kampànda munène mwikàlè nè cingoma cyà mbungu yìbìdì kulwayè ùpàtukila mu bisuku amu, nè kunkwàcishayè bwòwà bwà dikèma. Mèmè è kutùngunuka kuntwaku, mèmè kwìnama dyàkàmwè; mvwa nè bwòwà bwà kunyunga, nè bwòwà bwà nè nkwepì kwàlwàye kungaasa. Nènku bisuku bìvwa bìnyunga, pa nànkù mèmè è kushààla musòmbè ànu vivìvi.

³⁶ Nshìndi kutwàdijayè wènda ùbànda kakùnà aku, kàdi è kukùmàyè mbungu yònsò yìbìdì yìvwàye naayi ayi. Nènku kumupangilayè, nè nshìndi awu kupwekayè dyàmwàmwà dyà kakùnà aku. Mèmè kudyàmbidila nè: “Mpindyewu nengùùmukè; mutooyi wònsò awu ùdi ùmpinganyina. Yèyè mmupàtùlè mäsashì mu cingoma cyèndè.”

Ki mèmè kupweka kakùnà aku, ki muntu kwasayè cingoma ànu kumpàlà kwànyì aku. Cyòci kunsaka paanyimà mùshìndù ewu. Nènku mèmè è kubangila lwà apa nùnkù, bwà kupwekela lukwàbò luseke, ke cingoma cyà kàlibrè kàà .22 kutùdikaci, nè tùùndìmbà tùvumina pampàlà pàànyì apu. Mèmè nè: “Amba tùng, mèmè's ndi mu mwaba mubì be.”

37 Ki mêmè kukùdimuka è kupweka ku luseke lwà musùlù aku. Ki mêmè kudyàmbidila nè: “Nênye kuntweku bwà kusokoma too nè pààjikijàbo, bwà ngaamònakù mwà kupàtuka.” Kàdi mu njila wa dipweka, mêmè è kwenza bu ùdi mukòka. . . Ntèmà yànyì yivwa mikòkìibwe bwà kutàngila lwà ku luseke lwànyì lwà dyàbalùme. Nènku, ndi mwenzè ànu ntàngila anyì, ke cizubu cyà mfwankà eci munda mutupù mwaba ùvwà umwe wa ku bóbò abu mucimanshe panshì, mu lubilu lwònsò lwà. . . pàvwà nshindi yìpicila mu bisuku apu.

38 Ki mêmè kwambula diine dibùki dyà mfwankà edi, nè kutàngila. . . Ncìvwakù mudyambùle nànsha; mfwilaayiku luse. Mêmè kuditàngidila panshì. Ncìvwa mudyambùle to, bwalu ncìtu munangè mupùyà wà bintu abi to, ànu kwònsò nè kwònsò eku. Ki mêmè kutàngila panshi apu, nè nkù—nkùmpànyì kampànda wa mfwankà ùndì ngèèla meeji nè kabìvwa bikèngela kutèèla dìnà dyèndè to, kàdi nenùmanyè. Mbambepu nè: “Kataacilu kàà muntu udi wela meeji nè mwenya wà munù wa mfwankà.”

Mêmè kutàngila cintu aci, ki mêmè kudyàmbidila nè: “Kataacilu kàà muntu udi wela meeji?” Mêmè kudyàmbidila nè: “Bu muntu awu mwà kwela meeji nànsha kakesè, yèyè kí mmufwànyine kunwà mfwankà to nànsha kakesè. Mmunyì mùdiku kafwànyine kwikala ‘kataacilu kàà muntu udi wela meeji?’ Muntu udi wela meeji kí mmufwànyine kunwà mfwankà to nànsha kakesè.” Èyo.

39 Mpindyewu, mêmè kudyàmbidila nè: “Mùshindù mwine wùdìci ciseeswishangana’s wè!” Mpindyewu, kùmpànyì yà mfwankà ayi yidi nè cyà kwikala yà Àmèrikè. Kàdi kaa, bu twètù mwà kwikala nè mwoyi bilondèshile mèyì ètù mapunga, s’tudi bafwànyine kukwàta mudimu bwà kwambulwishangana bàmwè nè bakwàbò, patwikalà tumvwilangana njiyà umwè bwà mukwèndè. Kàdi mbyà lubombo kaayi s’wè! Kabingilà kândi nciyì mutèèlèle dìnà dyà kùmpànyì ewu to, ndi nè cyà kwamba bìmwè bintu bibì bwàbò bóbò. Kàdi mmùshindù kaayi wùdì muntu kanà yònsò ewu mwà kwikala mwena lubombo, bwà kupeta mfrangà?

40 Muntu udi wela meeji kààkunwàku mfwankà to nànsha kakesè. Kàdi mùshindù mwine wùdì beena Àmèrikè bàseeswishibwa bwà bwalu abu’s; bàdi bèèla meeji nè aci’s ncilenga be!

41 Mpindyewu tàngilàayi, kanwèna mwà, kanwèna mwà. . . Nùkonke muntu kanà yònsò ewu, beena maalu à mamanya, nenwikalè. . . Kanwènakù mwà kupeta mwìshi kakùyì kaandundu to. Kwòkò kwikàla mwìshi nànsha mukèsè bìshi ùpàtukilamù, nkaandundu. Nè wèwè kùyì upeta mwìshi nànsha mukèsè to, èè, kwèna upeta kaandundu to, nè kwèna upeta kantu nànsha kàmwè to. Udi ànu ukòkela ku mucì wà mùmè.

Kàdi paùdi ànu upetakù mwíshì nànsha wà mukesè bìshi, udi munkaci mwà kusuna kànsèrè, bulungù.

⁴² Bu nè nuwva naanyì cidimu cishààle eci, anyì cidimu cyà kumpàlà kwà cishààle eci, ngèela meeji ne mmùvwàbi, ku Cisalu cyà Cinsangàngàngà cyà Buloba bujima, cikondo civwà Yul Brynner nè bakwàbò kuntwaku mu dileeja dya bintu, nènku nuwva nubàmòna bàngata mfwankà awu, bàmwela mu cintu kampànda, nè bàmukòkela mu katùpà kàà marbre. Nènku yèyè ngàngàbukà awu wàngata ndàndà, ùmujìngilakù nè ùmushakù bulungù abu, nè ùbùtenteka paanyimà pàà nkose mutòòke, kàdi kumwelayè mu nsànji. Nènku matùkù mwandamutekète ònsò bàwva bàmupàtula. Nè nkose awu ùwva mùle tètè nè kànsèrè mu mùshindù wà kàciyi mwà kwenda to, kuumukila ku bulungù bwà ku mucì ùmwè wà mfwankà abu.

⁴³ Pashiishe kwambayè nè: “Udi mumanyè’s, bàdi bàmba nè udi mwà kuwùpwicila ku kataacilu.” Yèyè nè: “Kwèna mwà kupeta kataacilu. . . Kataacilu kanà kònsò kàdi kafwànyine kupatula bulungù, kàdi kàpatula mwíshì,” yèyè kwamba nè: “bwalu udi nè cyà kwikala nè mwíshì. . . kwikala nè kaandundu bwà kwenza mwíshì, kàdi’s kandundu aku ke kàdi kàfila kànsèrè.”

⁴⁴ Ki pashiishe kuyayè, kubùkòkelayè mu màyi, kwambayè nè: “Míngà misangu wèwè’s udi wela meeji nè udi mufwànyine kubùtaacilamù.” Yèyè kwamba nè: “Musangu wònsò, ùdi, nànsha wèwè mubùkòkèle mu cinyi.” Yèyè kwamba nè: “Bàdi bàmba nè: ‘Ncyèna mbùkòka to,’ pashiishe kubùtèeka mukana mwàbò kàdi kubùtwila.” Pashiishe kwangatayè aci è kucivùnga, nè kucitèeka mwinshì mwà cintu kampànda mwaba awu, nè kuleejayè nè civwa ànu nkànsèrè. Cyùdi wenza ncinyi? Udi ubùminna bùpicila ànu pàà muminu pèèbè apu. Nwamònu anyi? Nènku cyùdi wenza nànsha ciikàle cinyi, cidi ànu ndufù. Nwamònu anyi?

⁴⁵ Nè pashiishe pa kwela meeji nè kùmpànyì mmufwànyine kuseeswisha muntu mu mùshindù mukùmbàne, anyì kuteeta bwà kuseeswisha bantu bààbò sungasunga. Ncyènzà ànu bu ciminyi cidiyadyà byànà byàbò, byà mu cisumbù cyàci. Dibweja dyà mfrangà, mu disùmbisha dyà lufù kùdi—kùdi ditùnga, nè kùdi bansongààlumè. Kàdi bàpàtuka ku mwalu wà mvità kwàka bàkafwà bwàbò, pashiishe kukùdimuka kàdi kusùmbisha cintu cyà mùshindù awu, mu bwalu bulamakaja bwà mafi nè: “Kataacilu kàà muntu udi wela meeji, kàdi mwenya wà munù wa mfwankà.” Bivwa bikèngela bwà wèwè kwikala nè mwíshì bwà kupeta mwenya. “Mwenya wà munù wa mfwankà.”

⁴⁶ Mùshindù mwinè wùdi bantu bàcyùpukila’s wè, nànsha nànkù! Bàdi bàbùpeta. Mpindyewu, bìdi ànu bwà kutàmba kunùseeswisha. Nwamònu’s, mbyà kùdi dyabùlù. Bwà mwoyi webè kabwèna bubàtonda to. Kabèèna nè njiyà nànsha mikèsè

bwèbè wèwè to. Bàdi bànùsùmbisha cintàkanyì aci ànu bwà kunùbandila munùfwafwà, bwàbò bóbò nkupeta ànu mfrangà.

⁴⁷ Bu mùdì cidìdìdì nè mvità. Ncyèna ngiitabuuja mvità to. Ncyèna ngiitabuuja nè bivwa bikèngela bwà twètù kwikala bapetè mvità to.

Mémè ndi ngiitabuuja Bukalenge bunène bùdì Nzambì munkaci mwà kutwàla abu, dishidimuka dinène dyàpwekeshiibwa mwinshì mwà bukòòkeshi Bwèndè Yéyè bunène abu; kakwàkwikala mvità mikwàbò nànsha. Ditùnga kadyàkujuula mafùmà bwà kulwisha matùnga to. Byònsò nebìikalè ditalala, ditalala dyà Cyendèlèlèlè.

⁴⁸ Pa nàнку dishidimuka dyà mùshindù ewu didi ditwàla mvità. Kàdi patùdì tutàmba kulwa bashidimùke, mu cyòci eci, tudi tutàmba kupeta mvità yàbùngì. Ewu ùteeta kwikala mutàmbe kushidimuka kupìta mukwàbò, nè udi mutàmbe kushidimuka awu ùdi ùtàmba kwenza mvità yàbùngì. Nwamònu anyi?

⁴⁹ Kàdi mònaayi bwalu, mu edi dishidimuka, nè muntu mmufwànyine kupàtula cintu cyà mùshindù bu nàнку awu aci. Kàdi cintu cimwèpelè cidici cyènta, cidi cikuseeswisha bwà kukufikisha ku disùmba mfwankà yàbùngì menemene. Bwalu muntu yéyè ùnwa mfwankà. . . Nè mémè ndi ngèèla meeji nè mbyà kùdì dyabùlù, nè kùdì démon wa bulùngù mu mulùme nè, anyi mukàji. Nènku pìikalà mucì ùmwè wà mfwankà mwà kusànkisha démon wa bulùngù awu too nè mwà kushiyàye nkààyebè ùlekela dikutàcisha, nè mucì wà mfwankà ùmwèpelè. Nènku dìbà adi wangata kataacilu, ùshiya ànu cyàbisàtù cimwè cyà mwìshì awu ùpicilamù dìbà adi, ànyì cyàbisàtù cyà bulùngù kupicila mu cyòci aci amu, dìbà adi nebikèngelè micì yisàtù yà mfwankà bwà kwangatayi kaaba kàà ùmwèpelè awu, nènku neùnwe yisàtù pamutù pàà ùmwèpelè.

⁵⁰ Nwamònu's, cidi ànu dì—diyèlè cyanààna, diseeswisha, diyèlè dyà kuteeta kusùmbisha mfwankà. Bàdi mwà kusùmbisha yàbùngì mùshindù awu kutàmba mùdìbo mwà kusùmbisha ku dilekela muntu umwe ùnwa dyàkàmwè mfwankà wa kàpòndà mu cishibà cyèndè anyi mu mucì wèndè wà mfwankà. Mpindyewu, nwamònu's, ncyà dyabùlù.

⁵¹ Pàmvwà mwimàne mwaba awu mucitàngile apu, nè ngèèlangana meeji à mùshindù ùvwàci ciseswisha menemene, lukonko kundwilàlù. Nènku mémè kwinama cyàkàbìdì, kutàngila dibùki adi cyàkàbìdì, nènku mémè. . . kumwèkabi ànu bu nè cintu kampànda cingambila nè: “Kàdi cikemu cidi ànu cimpè, ‘kataacilu kàà muntu udi wela meeji, mwenya wà munù wa mfwankà.’” Kundwilabì nè diseeswisha adi, kàbìdì, mu cipaapu cyà mu bufùki amu mu mfwankà wa kàpòndà, ncintu kampànda cyà cifwànàngane nè maèkèleeziyà à leelù ewu, nwamònu's, diseeswishangana.

52 Mbifike too nè mùdì buloba bujimà bulwè diseeswishiiwa dinène dyà cidì cilelèlè menemene nè cidì cyà bushùwà. Nwamònu's, nànsha mu cidìidì, nè mu bwalu bwà nsòmbelu mulenga, mu tùlaasà, mu byònsò, cidì cishàala diseeswishangana.

53 Nsongààlùmè kampànda ùvwa ùngambila ditùkù dikwàbò nè ùvwa mupwèkè mu kampònyì kampànda kàà cilwilu, nènku mùsàlaayi wa citende bàvwa bamuzàzè kùdì katùmbà kàà mvità; bisùlusulu byèndè, cifù cyèndè, anyì cyònsò cìvwàku aci, bitùbula. Ki kuyabo ku lùpitaadi; bàvwa nè bangàngàbukà bàsàtù anyì bànaayi biimàne mwaba awu mu mulongo, nè bantu bònsò biimane mu mulongo. Nènku bàsàlaayi bàbìdì anyì bàsàtù bàkwàte mulunda wabò awu, nènku yèyè kàyì ànu mwà kweyela bìmpè. . . Musangu wònsò ùvwàye wèyela, lubadi alu lùvwa lùtwa ànu mu bisùlusulu byèndè amu, nènku aci cìvwa cìmufikisha kudizònzela mashi munda. Ki kushiyabò nsongààlùmè awu mwimàne mwaba awu mu mulongo amu, lwà paanyimà pàà mulongo apu, kàdì kubàlekela, bàmwè bàà ku bòbò balùmyànà abu kabàyi nè kantu to pa kumusha ànu disaamà dyà macì anyì cintu kampànda, bàpita kumpàla.

54 Nènku paambiyè kuumuka mwaba awu, kòlònelè kampànda kubwelayè mwikàle nè mwànà uvwa ne nzajila, mwanèndè wa balùme anyì wa bakàji ùvwa nè nzajila ku cyanza. È kwimanyikabò mulongo awu, bwà kubwejabò mwànà wa kòlònelè awu, kàdì nsongààlùmè awu ùvwa mutàpìke, ùpunga nè lufù. Ki bwalu mbwòbò abu's.

55 Kaa, bu kolònelè awu mwà kwikalakù mùmvwè njiya mishùwashùwàlè bwà mwanàabò uvwa pambèlù apu mu mulongo awu, ùvwa mwà kwikala mwàmbè nè: “Mwànà ewu ùdì mwà kwindila. Lwàyi nè muntu ewu lùkàsà, enzàyikù cintu kampànda bwèndè yèyè!”

56 Kàdì muntu yònsò mmuswè kuleeja bukòokeshi bwèndè. Mpindyewu, bònsò kabèèna mùshindù awu to; to, kabèèna bònsò mùshindù awu to. Kàdì kùdì bààbùngì bàdì mùshindù awu. Kùdì bààbùngì menemene bàà ku bòbò bàdì mùshindù awu. Kàdì muntu, cintu cìmwèpelè cìvwàye wèlela meeji, cìvwa ànu mwanèndè mukèsè wa balùme uvwa nè nzajila pa cyanza cyèndè awu, kàdì kàyìku mwà kutùma meeji kùdì nsongààlùmè mukwàte nè byà luse uvwa mwimàne mwaba awu muzaaza kùdì katùmbà kàà mvità awu to, katùmbà kàà mvità kiine nè pàmwàpa nsongààlùmè mwìnè uvwa mufwànyine kusungila mwoyi wèndè òngà ditùkù ku mwalu wà mvità. Nwamònu's, kabèèna biimana bwà kwela meeji to; ànu bwàbò bòbò nkàayabò.

“Kataacilu kàà muntu udi wela meeji.”

57 Mèmè kucitàngila, ki mèmè kudyàmbidila nè: “Ncyenzè bu— bu mùdì màngumba à leelù ewu aa, maèkèleeziyà atùdì naawù

aa.” Yònsò wa kùdìbò ùdì nè kèndè kataacilu kàà sungasunga; bàdì nè kataacilu kààbò kàà wàbò mùshindù. Bàdì bàlekela cyònsò cìdìbò baswè bwà kubwelamù aci, nè cìdì kaciyì mwà kubwelamù; cìdìbò bàbwejamù nè cìdìbò kabàyi bàbwejamù, nè kataacilu kàà wàbò mùshindù aku’s. Bàdì bàlekela ànu maalu à pa buloba búngì cyanààna àbwelamù bwà kusànkisha beena bupidyà bàdì mwómò amu abu. Nebàbàbwejè nànsa bóbò biikàle cinyì, bwà bóbò biikàle ànu nè mfrangà. Nebàbàbwejè nànsa bóbò biikàle cinyì, bwà bóbò biikàle ànu bamanyike.

Kàdì kùdì cintu cìmwèpelè pa bwalu abu, kwéna mwà kubwela mu Èkéleeziyà wa Nzambì mùshindù awu to; kàdì kí ndingumba to, ndì nswa kwamba Èkéleeziyà mulelèlè, mushùwashùwàlè wa Nzambì.

⁵⁸ Mùdì byapù byà mfwankà byà leelù ebi, bantu bàdì bàbwelà mu bìdìbò bàmba nè ng’èkéleeziyà ebi anyì màngumba, bàdì nè mwenya, nè wòwò mwenya awu ngwà cyena leelù wà bàà pa buloba. Nè òngumba nè òngumba dyònsò didi nè kataacilu kààdì sungasunga, nè bàdì bàtaata bèèla pambèlu beena Kilistò balelèlè bònsò bàvwà bafwànyine kwamba nè “amen” pàvwàye ùyiisha apu abu; nè bàbweja ba-Izàbèlè bònsò bàdì nè nsukì mibebula, nè kwisù kulaaba bilaabu bàdì mu ditunga edi aba, bu mùdìbò ànu bamanyike. “*Kampànda* útù ùlwa mu wetù. . . muntu mwendè luumù wa mu nsèndèma, muntu munène.” Awu’s ke wàbò mùshindù wà kataacilu kàdìbò bàkwàta naakù mudimu. “Dìngumba dyètù. *Kampànda*, mfumù wa ditunga, anyì—anyì kòlonelè, anyì muntu kampànda wa mu òngumba dyètù.” Nudi numòna nè nkataacilu kàà mùshindù kaayì kàdìbò bàkwàta naakù mudimu anyì? Kataacilu aku, mu bushùwà bwà bwalu, nkàà pa buloba, bantu bàà pa buloba.

⁵⁹ Bantu bóbò, mbamanyè cìdìbò baswè. Pa nàнку byòbì bikèngela bwà kupetabò cìdìbò baswè aci, dìbà adi nebikèngelè bwà biikalè nè kataacilu kàà mùshindù kampànda, nè búngì bukùmbàne bwà bàà pa buloba bàdì bààkwilamù, bwà kusànkisha mwenya wàbò wà pa buloba awu. “Kataacilu kàà muntu udi wela meeji, nyòòta yà munù wa mfwankà.” Kataacilu kàà bukwa-ntèndeleele, nè nyòòta yà muntu wa pa buloba.

⁶⁰ Mbaswè kwikala batèndeleele. Bàdì bèèla meeji nè bàdì nè cyà kwikala batèndeleele, bwalu bàdì nè musùkà.

⁶¹ Patwàkafikà mu ditunga edi dyàmbedi, nwakasangana ba-Indiens bakuukwila mèbà nè bikwàbò, bwalu (bwà cinyì?) yèyè’s mmuntu. Tudi twalukila mu bisuku nè meetu à mu Àfrikè mwàmwa, tusanganamù beena kalaba munkaci mwà kukuukwila cintu kampànda. Bwà cinyì? Mbantù, nè bàdì nè dìjinga adi, bàdì nè cyà kukuukwila.

⁶² Pa nàнку muntu wetù ewu, nànsa byòbì nè mmudìshìnde munyì, ùcìdì ànu mumanyè nè kùdì cintu kampànda mwaba kampànda. Kàdì ùdì nè nyòòta yà maalu à pa buloba be, mu

mùshindù wà nè kèna mwà kwangata kataacilu kajaalàme to. Bikèngela àpetè kèndè kataacilu kàà sungasunga kadyènzela aku. Muntu nè muntu mwikàle ùdyenzela kataacilu kàà wèndè mùshindù wà sungasunga.

⁶³ Kùmpànyì yònsò wa mfwankà ùdi ùtùmbisha yèndè mishindù, cidìbo mwà kwenza, “Kataacilu kalelèlè! Aka’s ki kataacilu kalelèlè! Kwònsò kumpàla!” nè byònsò mùshindù awu. Yèyè nè: “Mwenya ùdi ùlwa,” anyi cintu kampànda, “cifumina kumpàla.” Kaa, bwà dinanga dyà Nzambi. “Kumpàla”? Kàdi, ncinyi cidi paanyimà pààci’s? Ncyà bushùwà nè kî mmuntu mulùme udi wela meeji anyi muntu mukàjì udi wela meeji to. Kàdi aci’s ncidìbo bàmba, cidi ànu cìseeswisha bantu cyanàànà.

⁶⁴ Mpindyewu tudì tusangana, matùku aa nè, bantu bàdi nè majinga kampànda. Kàdi bwà cinyi muntu ùwanwa mfwankà? Mbwà kusànkisha nyòòta kampànda. Cidi muntu mukàjì ùnwina mfwankà ncinyi? Mbwà kusànkisha nyòòta kampànda.

⁶⁵ Nènku dìbà adi èkèleeziyà yèyè mudifwànyikijile, kasùmbù kàà batèndeledi, bàdi . . . bwà kubwejamù bantu, bàdi nè cyà kwikala nè kataacilu kàà mùshindù kampànda bwà kupèèsha bantu mwenya kampànda ùdìbo bàswè. Pa nàнку bòbò kabàyi bapetè mwenya kampànda wùdìbo baswè to, kabèèna bananga mfwankà awu to. Nènku bòbò kabàyi mwà kupeta mwenya wùdìbo baswè mu ntèndeleele to, kabèèna bàngata ntèndeleele awu to. Mpindyewu, bitòoke tòò ne mwàbì mwònsò’s.

⁶⁶ Bakàjì bavwàle tùpùtulu, nè nsukì mibebula, kwisù kulaaba bilaabu, bavwàle mvwàdilu wa ùsalulangana masandi, ke cidìbo baswè aci. Mbanangè aci.

⁶⁷ Mùmvwà ngàmba mu dindà emu nè mu dyàlumingu dishààle mu dindà, pa lukàtà alu munkaci mwà lukàtà, ànyi musùùkà awu ùdi munda mwà nyumà. Mùshindù mwinè wùdi nyumà wa pambèlu, pankaci pàà musùùkà nè mubidi, kakùyì mpatà to mwà kwikala mwediìbwe maanyi kùdi Nyumà Mwimpè. Nwènu bònsò nuwva bùmvwè aci anyi? [Disangisha didi dyàmba nè: “Amen.”—Muf.]

⁶⁸ Mpindyewu bwà kulonda cyòci aci nè ntùngùnukilu wa Mukenji, *Nzambi Wa Buloba Ebu, Balaaba Maanyi Mu Matùkù À Ndekeelu*. Pambèlu apu, cijèngu cyà munkaci aci. . . Cijèngù cyàkumpàlà cidi byumvwilu byà—byà buntu. Cijèngù ciibìdì mbyumvwilu byà nyumà; diswa, budiswìlè, dijinga, nè bikwàbò. Kàdi munda mùdi musùùkà; musùùkà awu ùwva mudyànjila kulongolola.

Pa nàнку, bàdi mwà kulaaba nyumà ewu maanyi bwà kuvwija mubidi wà pambèlu ku dibwela mu dikòokela dyà nyumà. “Kàdi musùùkà wùdi wènza mpèkaatù, musùùkà awu newùfwe.” Musùùkà wùdi wùbènga, mu bupidyà, Dìyi dyà Nzambi, wòwò awu ncitùpà cyàwù aci, musùùkà awu newùshaalè Cyèndèlèlèlè. . . wùkaadi, misangu yònsò.

⁶⁹ Mémè ndi ngiitabuujja lufù lwà Cyendèlèlè, ànu mûndi ngiitabuujja Dyulu dyà Cyendèlèlè amu, kàdi kî ng'ifernò wa Cyendèlèlè to. Cintu pààci nè ng'ifernò wa Cyendèlèlè kacitukù to. Kùdi lufù lwà Cyendèlèlè bwà bantu bàdi. . . Bààbúngi bàà kùdìbo, batèndeledi, pa buloba leelù ewu, bàtu misangu yònsò ànu bafwè.

⁷⁰ “Mukàji udi nè nsòmbelu wa bisànkasanka,” nè nsuki yèndè mibebula ayi nè kwìsù kulaaba bilaabu awu, “mmufwè pàdiye nè mwoyi apu.” Bible ngudi mwàmbe nànkù. Nwamònu anyi? Nwamònu's, yèyè ùdi mwà kwikala mutèndeledi, kàdi kàvwa musùngidiibweku to. Ùdi nè disaluka dyà pambèlu. Mmufwànyine kwikala wimba mu kòrale, anyi mmufwànyine kujà maja mu Nyumà, mmufwànyine kwakula mu myakulu, nè kupeta mamwèneshiibwa ônsò à Nyumà. Kàdi musùukà udi munda awu wòwò kawùyi wà mwànà wa bakàji wa Nzambi to, nwamònu's, yèyè mmuyè, cidiye wènza nànsha ciikàle cinyi.

⁷¹ Izalèlèlè ùvwa mu mîshindù yònsò yà nyumà lwà pambèlu, mùle tètè nè bwìmpè bwà Nzambi, nè mùvwàbo bàneemeka Nzambi bikolè, nè bikwàbò amu, kàdi aci kaciyàkakumbana to. Munda mwàbò amu kamùvwa mwà kujingulula Dìyi Dyòdi diine to.

⁷² Kàdi paùdi ulediibwa ku Nyumà wa Nzambi, díbà adi udi nè. . . udi mwànà wa Nzambi, nè wèwè uvwa misangu yònsò ànu mwànà wa Nzambi, nè newikalè misangu yònsò ànu mwànà wa Nzambi. Kakwèna mùshindù wà kucitapulula to, bwalu cidi. . . udi nè Mwoyi wà Cyendèlèlè. Nè wà Cyendèlèlè kàwùtukù mubange to; anyi kawàdyàkujikaku to.

⁷³ Kaa, bwà ngàsà wa Nzambi, bwà Yèyè kutùpèèsha dyumvwa dyà maalu masokoka manène à mùshindù awu! Mùvwà Pòlò mwakùle kaaba aka, wèwè mutùngùnùka nè kubala mu Efèsò mwàmwa, wàkula bwà mulùme nè mukàjèndè, wàmba nè: “Eci mbwalu busokoka,” mùshindù ùvwàbi bikèngela bwà bakàji kwikalabò nè kaneemu kùdi bàyèndè. Nànsha mene mmwaba mwibìdi, ngèlè meeji nè mmwòmu, mu Bible mujimà, mùdìbo baakùle bwà kaneemu kààbúngi. Yèyè nè: “Mukàji, àtabaleela nè ùdi kaneemu kààbúngi kùdi bàyèndè, kaneemu kààbúngi kùdi bàyèndè.” Díbà adi bìvwa bikèngela bwà mulùme kwikalayè nè nsòmbelu kumpàlà kwà mukàjèndè wa mùshindù wà nè mukàjèndè wàmòna mwà kumupeesha kaneemu kààbúngi bu mwànà wa Nzambi. Nènku yèyè kàyì nè nsòmbelu wa mùshindù awu to, èè, díbà adi, mu bushùwà bwà bwalu, kî mmufwànyine kumupa kaneemu kààbúngi to, bwalu mmumanyè cidi cimwenza naaci. Kàdi pàdiye muntu mulùme udi mulùme wa kaneemu, wa kaneemu nè mukezùke, nè mukàjèndè nè kumpàlà kwà díkù dyèndè, musadidi mulelèlè wa Nzambi, díbà adi bakàji, bàna, nè bònsò, bìvwa bikèngela kuneemeka musadidi wa Nzambi awu, nè kaneemu kààbúngi.

74 Mònaayi mpindyewu. Mukàjì, mbaswè kwikala nè nsuki mibebula. Mbaswè kuvwàla tùpùtulù, badilaabe bilaabu, nè tupenta. Tuubikini tukesè etu nè bikwàbò bìdìbò—bìdìbò bàvwàla matùkù aa, mbaswè kucyènza; kàdi pààbò's mbaswè kuya mu èkèleeziyà. Nudi numòna dilaabiibwa adi pa nyumà awu, kí mpa musuùkà to. Nwamònu anyi?

75 Wàmba, muswè kwikala mwena Kilistò kàdi wènza kàbìdi bintu ebi, cikòlà mpaasàtà wàmba nè mbîmpè. Dìbà adi yèyè mwambè nè mbîmpè: “Udi mwà kwikala cidimba; dîna dyèbè didi mwà kwikala mu mukàndà wànyì wà èkèleeziyà emu; mbîmpè,” dîbà adi ùdi ùmupèèsha kèndè kataacilu kàà cyena dîngumba bwà kukùmbanangana nè nyòota yà mukàjì wa maalu à pa buloba. Yèyè ùtu munangè maalu à pa buloba; ùtu munangè mwenya wàwù's. Pa nàнку ùdi nè kataacilu bwèndè yèyè, kàdi ùdi kule be nè kwikala mukàjì udi wela meeji. Kàdi's ki bwalu mbwòbù abu. S'ke mwaba ùndì mupetele cyena-bwalu eci.

76 To, yèyè kí mmu—mukàjì udi wela meeji to. Bu nè ùvwa wèla meeji, ùvwa mufwànyine kumanya nè èkèleeziyà kààkumulumbulwisha ku Ditùkù dyà ndekeelu to. Èkèleeziyà ùdi munkaci mwà kumulumbulwisha mpindyewu ku buumambalà bwèndè, lulamatu lwèndè ku bitàngù byèndè bìdiyè ùsanganyibwamù nè bisumbu. Bàdi munkaci mwà kumulumbulwisha mpindyewu ku cyòci aci. Kàdi Nzambi neàmulumbulwishè ku Ditùkù dyà ndekeelu. Pa nàнку yèyè kènà wèla meeji to.

77 Ànu mùdi muntu udi unwà mfwankà awu; mmunangè mfwankà bikolè mu mùshindù wà nè byeledi byèndè byà meeji mbishààle bipàcisha kùdi bulungù bwà mfwankà. Nè majinga à mukàjì mmatàmbe kupàcisha byeledi byèndè byà meeji mu mùshindù wà nè neénzè bintu ebi bìdi bibi ku mèsù kwà Mukalenge, bwalu yèyè mmuswè kucyènza; cidi cisànkisha mwenya wà mukàjì wa pa buloba. Nàнку ùdi wàngata kataacilu kàà èkèleeziyà wa maalu à buloba; ùdi ùpicilamù buludi, bîmpè, kakùyì cintu nànsha cìmwè cyà kumutàcisha. Bileeja nè. . .

78 Mpindyewu tudi tumòna mwaba awu nè aci m'Bulelèlè. Kàdi mpaasàtà ùdi wàmba nè: “Abi's bidi ànu bîmpè. Katwèna tupiisha bakàjì bwà kwenza kwà nàнку to. Bìdi ànu bîmpè.” Kùdi mpèkaatù wabùngì mu cintu aci; aci's nkupicila mu kataacilu kèndè. Bidi bileeja nè mbapicile mu kataacilu kàà tèlòjì. Nènku bàdi nè mwenya wà tèlòjì; nè bàvwa nè mwenya wà tèlòjì. Kàdi ncyà bushùwà nè kacyàkopicila mu Kataacilu kàà Nzambi to. To, mukalenge.

79 Mpindyewu, kòkò kwikale kataacilu kàà tèlòjì bwà mwedi wa meeji wa tèlòjì, nènku kùdi kataacilu kàà èkèleeziyà bwà mwedi wa meeji wa mu èkèleeziyà, kataacilu kàà mfwankà bwà mwedi wa meeji wa mfwankà, kùdi nè cyà kwikala kataacilu kàà cyà bushùwà mwaba kampànda bwà mwedi mulelèlè wa meeji.

Nè Nzambi ùdi nè Kataacilu, nè aci n'Diyi Dyèndè. Ncitàpuludi, bwalu Cìdi màyi à ditàpulula bwà mpèkaatù. Mpindyewu, ki mwenya wà muntu udi wela meeji anyi wà muntu wa cijila.

⁸⁰ Nènkù muntu yéyè mupicìle mu kataacilu kàà mùshindù ewu kàà pa buloba, ùdi—ùdi nè nyòòta yà maalu à pa buloba. Nènkù ànu mùdi kùmpànyì wa mfwankà wa kàpòndà, ùdi ùtàmba kupeta baamambàlà mu èkèleeziyà wèndè mu kubàpuushila mu kataacilu aka. Bòbò bàmba nè: “Kùdi bakàji bààbùngì bàtù bàya mu èkèleeziyà kutàmba bantu balùme.” Bìdi mwà kwikala nànkù. Mpindyewu, aci cìdi mwà kwikala cyònsò cilelèlà, pàdiye mwà kuya kwenza cyònsò cidiye muswè kwenza aci. Ncyà bushùwà. Yéyè neenzè, neàdisangè nè cintu kanà cyònsò, kàdi mmukapicìle mu kataacilu kàà èkèleeziyà aku. Bu yéyè mwà kwikala mupicìle mu Kataacilu kàà Nzambì, nùnkù's mmupàtùkemù bishìilàngàne nè aci's. Nwamònu anyi? Kàvwa mwà kupicìla mu Kataacilu kàà Nzambì kàdi kupàtùkamù nè nsukì mibebula to. Kèna ànu mwà kucyènza to.

⁸¹ Mpindyewu eci necìikalè cyà—cyà bululu ndambù pàmwàpa bwà muntu kampànda. Kàdi pàakabangàye kupicìla mu Kataacilu kàà Nzambì, nè Ciikàle cyàmba mwómò amu bwà kabàkòshikù nsukì yàbò to, dìbà adi (ncinyi aci?) mmusòmbele ku lukwàbò lusekè. Piikalàci cyàmbe nè bìdi mpèkaatù bwà mukàji kwenzayè nànkù, nè mbyà bundù bwà yéyè kwenza nànkù.

“Yéyè muswè kucyènza,” mwàkambàye, “èè, bikèngela àkose nsukì yèndè.”

Kwambayè, dìbà adi nè: “Yikungùle yònsò dìbà adi's.” Ki kwambayè nè: “Tudi bamanyè nè bìdi bundù bwà mukàji kwikalayè nè mutù mukungula.” Yéyè nè: “Nànkù mulekèlaayi ìkalè nè mutù mubwikila.” Nè nsukì yèndè's ki cibwikilu cyèndè; kí ncifulu to, inàbànzà. Nsukì yèndè ki cibwikilu cyèndè, mmùdi Bible mwàmbe. Cyà bushùwà. Bìdi bileeja nè yéyè m'Mùnanzi kùdi Mukalenge. Nsukì mile, kùdi mukàji kampànda, yìdi yùmvwija nè m'Mùnazi kùdi Mukalenge. Mpindyewu, tudi tusangana nè aci ncilelèlà.

⁸² Kàdi tudi tusangana nè muntu udi wela meeji, wa ku dínà kùdi bàà pa buloba awu, ní ùdi mwà kunwà mfwankà nè kupeta ànu mwenya wèndè, ùdi ne cyà kwikala nè cyumvwilu cikùmbàne bwà kumanya nè ùdi munkaci mwà kunwà kandundu kàà mu mfwankà wa kàpòndà. Kàdi cìdi ànu, cìdici cyenzè, nkumusùmbisha wabùngì mutàmbe, kumusùmbisha mfwankà yàbùngì mutàmbe.

⁸³ Nè kataacilu kàà èkèleeziyà kàdi kàngata buumambàlà nè bintu byà mùshindù awu pàdìbo bàbàlekela bàpìcìla mu cintu kanà cyònsò kàdi biikàle ànu bàà mu èkèleeziyà, bàdi bàpeta bidimba byàbùngì. Àmbàbi tǔng bu twètù mwà kuya mu maèkèleeziyà dilòòlò edì nè kutaata bantu bònsò pa kuumusha

aba bàvwà beena Kilistò bashùwashùwàle balediibwe kùdi Dîyi abu. Kùvwa mwà kwikala mayiisha àbùngi mayiisha bimanu dilòòlò edi, ncyà bushùwà, bwàlu àvwa mapicile mu Kataacilu.

⁸⁴ Kàdi mèmè mwikàle nè dijinga kampànda mu mwoyi wànyì, nè ndi ntèkemena nè muntu yònsò udi untèeleja ùdi nè cintu cimwècimwè eci nè: “Nzambi, mpicishilèku mu Kataacilu Kèèbè.” Bu mwàkamba Davìdi nè: “Nteetèku, nè unngèleku ku cipimu, nè ùmonè ní kùdikù bubì kampànda munda mwànyì, pa díbà adi bùmùshèku, Mukalenge.” Nwamònu anyì? Ndi muswè Kataacilu kàà Nzambi. Cidi bàà pa buloba bènza nànsha ciikàle cinyi, cidi èkèleeziyà naaci nànsha ciikàle cinyi; ndi muswè kwikala muntu udi wela meeji, pa kwela meeji nè nkùdi Nganyì kungùikalà mwimanyine ku òimwè dyà ku matùkù àdi panshì aa, bwà Cilumbulwidi.

⁸⁵ Mònaayi nè, kùmpànyì wa mfwankà awu ùdi ùcyènza bwà kusùmbisha mfwankà yàbùngi; èkèleeziyà ùdi ùcyènza bwà kupeta bidimba byàbùngi. Mukàji kampànda nè nsukì mîpi, mupwàle tùpùtulù, ùvwa mwà kukwaciibwa mu Kataacilu kàà Nzambi. Kàvwa mwà kupicilaMù to, nè nsukì mîpi, bwalu Bible mmwàmbè nè kabìvwa bikèngela bwà kucyènzayè to. Ùdi ùfwisha mutù wèndè bundù pàdiye ùcyènza apu. Bivwa bikèngela bwà twètù kucimanya. Kàdi yèyè ùdi ùpicila ànu mu èkèleeziyà bìmpè, bakwàbò bònsò abu. Mèmè ntu misangu mikwàbò ngiimana . . .

⁸⁶ Nciyi mpwekesha muntu kampànda milongo to; nciitu mèmè ngàakula bwà muntu kanà yònsò ewu to, kàdi mmpèkaatù udi mu èkèleeziyà. Nwènù nudi numfidila bujaadiki bwà cyòci aci. Ncyèna mwàmbè nè: “Mandèmwàzelè *Kampànda ke kansanga*, anyì Mukalenge *Kansanga*, anyì Révérend *Kampànda ke kansanga*” to. To, mukalenge. Ndi ngàmba nè mpèkaatù’s mmpèkaatù. Yèyè mwikàle mu díkù dyànyì, yèyè munda mwànyì, yèyè munda mwà ní nganyì ní nganyì, ùdi ànu mmpèkaatù. Kí mmuntu-nkàâyà to, ncyènà ngàakula ndwisha bantu-nkàâyà to. Ndi ngàakula ndwisha mpèkaatù. Mèmè ncyènà ncyùka ní mmèmè anyì ní nganyì yònsò, udi ukèba kupicila mu Kataacilu kàà Nzambi, mpèkaatù kanà yònsò ewu neàkwimànyikè ànu mwaba awu.

⁸⁷ Mònaayi. Kàdi mukàji udi muswè kwikala nè nsukì mîpi nè kuvwàla tùpùtulù awu, anyì kulaaba tùpèntà nè bikwàbò byònsò, ùdi mwà kupicila mu kataacilu kàà beena Mpenta ànu bipeepèlè pèpèlè, kakùyì bwalu nànsha bùmwe to, buludì too nè mu lufù. Bwalu, yèyè awu . . . Yèyè ùdi wàmba nè: “Èè, kakwèna bwalu bubì mu biinè abi nànsha.”

“Wèwè munangè maalù à pa buloba anyì bintu byà pa buloba, mbwalu dinanga dyà Nzambi kadyèna nànsha mene munda mwèbè to.”

⁸⁸ Mwĩnshì mwà nyumà ewu, díbà adi, ùdi mwà kukòkela lwà kwĩnshì eku kubweja munda mwà musùùkà wèndè, bintu bìdì kabìyì byà Nzambì nè bìbèngangana nè Dìyì dyà Nzambì, piikalàbì nè kì nyòòta yà mu musùùkà. Cìdì mwà kulwila ku mwenya; *lumòno, lulabulu* . . . Cìdì mwà kulwila ku *ngeelèlù wa meeji*, ku *dilukakaja dyà lungènyi* nè: “Kakwèna bwalu bubì nànsha bukesè mu cyòcì aci to. Ndi nè mwenya. Ndi nè njiya. Ndi nè njiya yà nè eci cìdì ànu cìmpè.” Ùdi mwà kutùùluka buludì mu cyòcì aci, nè kubwela buludì mu musùùkà wèndè, piikalàbì nè musùùkà wèndè ngwà mùshindù awu. Bìdì bìleeja nè kèna ùpicila mu Kataacilu kàà Nzambì to.

Kàdì byòbì nè ùdi nè nsukì mibebula, mulaabè bilaabu, tùpùtulù, mìpanù, ùmwènèka bu muntu mulùme, mìpanù yònsò eyi nè mwònsò mùdìbo mwà kubìbìkila amu; wàmba bintu byà mùshindù awu abi, nè wènta bintu abi, nè mwikàle nè mwoyi bwà byà pa buloba, yèyè neimanè; kèna mwà kupicilaMù to. To, mukalenge. Nebùmwmànyike ànu ku cibangidilu aku.

⁸⁹ Mònaayi nè, muntu mulùme ùtàngila mishikù yèndè milenga mikùnze ayi nè kwisù kulaaba bilaabu, nè tùpùtulù nè—nè bikìni, nènkù nànsha yèyè mwikàle nè cinyi; muntu mulùme mulelèlè udi wela meeji kàkutàngila mukàji awu to. Mpindyewu, muntu mulùme udi cidimba cyà èkèleeziyà neàmùtàngile, ùmukàcila. Nànsha yèyè ùmwèka bishi ku mèsù, muntu udi wela meeji neàtàngile kwà pàtupù. Bwà cinyi? Yèyè mmupicile mu Kataacilu kàà Nzambì, nè mmumanyè nè kumutàngila nkwenda masandi mu mwoyi wèndè. Yèyè kèna wèla meeji nè mukàji awu mmulenga to.

Wèwè udi wamba nè: “Yèyè kì ncintu cilenga anyi!”

Kabyèna nànkù bwèndè yèyè to. Mmukàji wa mmwènèkelu mukooyike, Izàbèlè mukèngeledi wa luse, kùdì muntu udi wela meeji. Mwànà wa balùme wa Nzambì ùdi ùmutàngila nè bundù bwà diikala dyèndè mene mu dikhù didiye ùsanganyibwa adi. Ncyà bushùwà. “Mmunyi mùdì awu mufwànyine kwikala mwanèètù wa bakàji kàdì wènta maalu mùshindù awu?”

⁹⁰ Nwamònu’s, yèyè mukàji awu mmupulumwina mu kataacilu kampànda, nè mulùme awu pèndè mu kakwàbò. Kàakwelakù meeji nè mukàji awu mmulenga to, nànsha kakesè. Aci kì mbulenga kùdì muntu mulùme mulelèlè wa Nzambì to.

⁹¹ Vùlukàayi nè, musangu kampànda kumpàlà kwà Mashi à Yesù Kilistò kulwawù Kataacilu, mutwàfikàku mu tusunsa tukesè emu: “Bànà bàà balùme bàà Nzambì bààkatàngila bànà bàà bakàji bàà bantu, nè bàwva balenga, nè kubàngata bu bakàji.” Kacya Nzambì kàakacifwakù luse to. Byàkenzeka kàbìdì, mu lwendu lwà Izàlèlèlè, nè Nzambì kàakabàfwilakù luse to. Muntu nè muntu wa kùdìbo wàkabùtuka.

Kataacilu kàà muntu udi wela meeji!

Mvwa mupàtùke mu disangisha emu, mvwa ka-Ricky kakesè kiimàne lwà paanyimà pàà èkèleeziyà apa dilòòlò kampànda, kungambilaye, kùkaadi bidimu bu bisàtù anyì binaayi nàнку awu, wàmba nè: “Cidì cyenze nè wikalè wamba nàнку awu, wèwè’s udi muntu mununu.” Yèyè nè: “Mémè ngèla meeji nè bàdi bàmwèka bìmpè be.”

Mémè nè: “Ndi mwà kudifwànyikijila aci.” Ànu ku mmwènekelu wendè cyanààna, udi mwà kumanya ciwà mmwènekelu wendè. Mémè nè: “Lekèlà nkwambileku bwalu kampànda. Wèwè udi nè bidimu bìngà?”

“Bidimu bitwè ku makùmi àsàtù.”

⁹² Mémè nè: “Pàncivwà nè bidimu dikùmi nè bitaanu bishààdile kùdi wèwè, mvwa ngeela meeji ànu mùndi ngeela emu.” Cyà bushùwà. Nè cìcìdi ànu bukooya!

⁹³ Kataacilu kàà muntu udi wela meeji! Mpindyewu mònaayi nè, yèyè wikalà, nè meeji èndè mataacila mu Dìyi dyà Nzambì, Kataacilu kàà Nzambì, kààkutàngilakù mukàjì awu to. Kàkwelaku meeji nè mukàjì awu mmulenga to; neàdyambidilè nè mukàjì awu n’Izàbèlà. Nèadyambidilè nè, paanyimà pàà mishìku mikùnze ayi pàdi ménù à nyòkà à lulengu àdi màfwànyine kumusùma. Nè Bible mmwambè nè: “Biibi byèndè abi mbiibi byà ifernò; nè muntu mulùme udi ùbwelamù byenze bu ngombe ùya ku cishipeelu cyèndè.” Ki Kataacilu kàà muntu udi wela meeji nkòkò aku.

⁹⁴ Cyùdi ujinga ncinyi? Pàdi mukàjì ùpweka nè mùsèèsù mulwàte mùshindù awu, nènku nwènu balùme nukùdimuna mutù wènu, nushààla bamulèngèmena mùshindù awu, kanwèna nukwàta mudimu nè Kataacilu kàà muntu udi wela meeji to. Bwalu, panùdi nwenza nàнку, nudi nwenda masandi, bwalu Kataacilu kàdi kàmba nè: “Ewu yònsò ukàtàngidi mukàjì bwà kumwalakana wàmanyi kwenda nendè masandi.” Kùdimuna mutù wèbè, wèwè mulùme udi wela meeji. Umùkà kùdiye aku. Yèyè kì mmulenga to. Yèyè nnyòka; ncyà bushùwà, wènda ùdìnyònda ànu bu nyòka, wènda maalù ànu bu nyòka, ùsùmangana ànu bu nyòka. Ikàlà nendè ntàntà mule.

⁹⁵ Kaa, èyowà’s, Dìyi dyà Nzambì ki Kataacilu kàà muntu udi wela meeji. Muntu kanà yònsò ewu mmumanyè nàнку. Ki mùdi musùukà wèbè mutaaciùbwe, Dìyi dyà Nzambì adi. Nè Didi dyènta nè, paùdi upìcila ku kàà Nzambì. . . Pàdi muntu udi wela meeji ùpìcila mu Kataacilu kàà Nzambì, bìdi bìmupèèsha mwenya wà muntu wa cijila. Ncyà bushùwà. Paùdi upìcila mu Kataacilu kàà Nzambì, díbà adi mwenya wèbè mmwenya wà muntu wa cijila. Bìdi byènta mwenya wà muntu mwakàne. Cikemu mu bushùwà bwà bwalu ncìmpè.

⁹⁶ Mpindyewu tudi tujandula mùdi cyòci eci cyènjìibwe mu cifwànyikijilu, mu Izàlèlèlà, bwà disangisha dyà Izàlèlèlà nkààyaadi. Ki bwà cinyi, mu dyakula dyà cyòci eci mpindyewu,

bambi bôbò babèngangana nè cintu kanà cyônsò cidi cyambiibwe; eci mbwà disangisha dyànyì didi Mukalenge mumpèèshe bwà—bwà kuyiishamù.

⁹⁷ Mònaayi mu Ekèsòdè 19, ndi muswè nùcibalè panwàlukilà kumbèlu, panwàpetà díbà dyàbúngì apu. Mònaayi nè, cikondo cívwa Izàlèlèlà mwenze mpèkaatù, kumpàla bàvwa bàngata mwànà wa ngombe mukünze uvwa kacya kàyì mwànji kwambula mucì wà cikòkelu pa nshìngù pèndè to. Aci cívwa cyùmvwija nè kacya kàvwakù muswiküibwe ku cintu nànsha cimwè to.

⁹⁸ Nènku bìvwa bikèngela kwikalayè mukünze. Diikala dikünze ndiikala dyà—dyà difuta dyà cibawu. Nudi bamanyè's, maalu à mamanya mmamanyè nè wèwè mwangàte cintu cikünze mucitàngidile mu cikünze, ku cikünze, cidi citòòke. Ûdi ùtàngidila mu Mashi makünze à Mukalenge Yesù, nè mpèkaatù yètù mikünze yilwa mitòòke zee bu nèjè; cikünze mu cikünze amu.

Nè ngombe wa lukùngùlù ùvwa ùshipiibwa ku ibaamulòòlò, kùdi disangisha dijimà dyà Izàlèlèlà.

Nè kwàkalaabiibwa mishoonyi mwandamutekète yà mashi èndè ku ciibi kùvwà disangisha dijimà nè cyà kubwelela aku; cimfwànyì cyà Bikondo Mwandamutekète byà Èkèleeziyà, ku Mashi awu's.

⁹⁹ Nè pashiishe mubidi wèndè ùvwa wàngaciibwa nè wòshiibwa. Ûvwa wòshiibwa nè bikònò, nè cisèba, nè mala, nè tùmvi. Byònsò bìvwa byòshiibwa, pàmwè.

Nè bìvwa bikèngela kwambwibwabì kùdi muntu mukezùke, nè bìvwa bikèngela kutèèkiibwabì mu kaaba kakezùke pambèlu pàà disangisha. Kì bwà cinyì, bu Izàlèlèlà mwà kumòna ànu cimfwànyì aci's wè! Dìyì dyà Nzambi edi kadyèna nè cyà kulengiibwa kùdi byanza byà manyaanu byà bupidya to. Bikèngela ikalè muntu mukezùke. Nènku piikalàye mukezùke, bivwa bikèngela kupicilayè mu Kataacilu kàà Nzambi.

Muntu mukezùke, byanza bikezùke, nè bìvwa bikèngela kwikalabi bilamiibwe mu mwaba mukezùke; kí mmwaba wùdi ba-Izàbèlà, nè ba-Rickys, nè bintu byònsò bisanganyiibwa to; bàngata mèèsà àà mukalenge ne bikwàbò, pàdibu bànyeemakana eku nè eku nè bakàji, nè balùme, nè bukooyà bwà mishindù yònsò; baya mu dija dyà maja nè maafètes, nè biikàle nè nsukì mibebula, nè tùpùtulù, nè bikwàbò byònsò, kàdi badibiikila mùdìbo beena Kilistò. Cidi nè cyà kulamiibwa mu mwaba mukezùke, nè cyambula kùdi byanza bikezùke.

¹⁰⁰ Nè pashiishe pààkenzà Izàlèlèlà mpèkaatù, nè kujingulula nè bàvwa benzè bibì, pashiishe bàvwa bamyaminyiibwe nè butù bwà lukùngùlù lwà ngombe elu, pambidi pààbò. Nènku aci cívwa mmàyi à ditàpulula, dikezula dyà mpèkaatù.

¹⁰¹ Mònaayi. S'ki cyôci eci! Nè pàvwà Izalèèlà, kumpalà kwà kubwelabò mu bwobùmwè mu dikuukwila, bivwa bikèngela bwà kupicilabò dyàmbedi mu mâyi à ditàpulula. “Dibingishiibwa ku diitabuuja; didi difùmina ku ditèèleja, ditèèleja dyà Dîyi.”

Pashiishe bàbwela mu disangisha mwinshì mwà mishoonyi mwandamutekète ayi, mashi awu, bwà kuleeja nè cintu kampànda ncifwè nè cibàdyànjidile, bwà mpèkaatù wabò. Bàvwa batàpùlùke ku dyumvwa dyà Dîyi, mâyi à ditàpulula, pashiishe kubwela mu bwobùmwè.

¹⁰² Mwaba ùmwèpelè ùvwà Nzambi ùtwilangana nè muntu ùvwà m'paanyimà pàà bulongàme abu. Kàvwa mwà kutwilangana nendè ní mpenyi pakwàbò to. Ùvwà nè cyà kulwila paanyimà pàà bulongàme abu. Nzambi ùvwà ùtwilangana nè Izalèèlà ànu mu mwaba wùmwèpelè.

Nè Nzambi ùdi ùtwilangana neenù leelù ewu ànu mu mwaba wùmwèpelè, nè mwine awu mmu Yesù Kilstò; nè Yèyè ùdi Dîyi, mâyi à ditàpulula. Nè Mashi Èndè àkeediibwa panshì bwà Bikondo byònsò Mwandamutekète byà Èkèleeziyà. Nè pashiishe, ku Nyumà Mwimpè, tudi tubwela mu bwobùmwè abu, bùdi bufidiibwe ànu kùdi Èkèleeziyà. Kaa, mùshindù mwinè wùdiYe munène's wè!

¹⁰³ Kàbidì, mpindyewu, tudi baswè kutàngila mu Efèsò 5.26, mmwambe nè: “Ndyoweshiibwa dyà mâyi ku Dîyi,” mâyi à ditàpulula. Cidi cyènta cinyi? Dìbà adi, Kataacilu kàà Nzambi's n'Dîyi. Mâyi à ditàpulula, “dyoweshiibwa dyà mâyi, à ditàpulula, ku Dîyi,” Kataacilu kàà Nzambi.

¹⁰⁴ Dìbà adi, kwèna mwà kubwela mu Kilstò ku kataacilu kàà èkèleeziyà to. Kwèna mwà kulwila ku kataacilu kàà cyenamàngumba anyi ku kataacilu kàà twitabàayi kampànda to. Kùdi Kataacilu ànu kàmwèpelè, kaùdi mwà kubwelela mu mwaba wà cijila awu, aci's nku “dyoweshiibwa dyà mâyi ku Dîyi.” Dîyi dyà Nzambi ki Kataacilu kàà muntu udi wela meeji.

¹⁰⁵ Èkèleeziyà neàkulumbulwishilè kaaba aka nè wèwè udi cidimba cimpè, anyi to. Nèbàkwenzèlè madilu mimpè, nè bàkupwekeshila dibèndelà ditùkù dyà lufu lwèbè, kutùma bikùtù binène byà bilòngò nè—nè kukwenzela bintu byònsò. Kàdi pàkaadibi bikafika ku musùkà wèbè wùkungamangana nè Nzambi, bìdi bikèngela wikàle nè Mwoyi wà Cyendèlèlèlè. Nènku cyôci ciikàle Mwoyi wà Cyendèlèlèlè, naitùpà cyà Dîyi. Nènku ànu mùdi dîyi dyànyì mèmè mwine kadiyi mwà kuvila . . .

Cyanza cyànyì mèmè mwine kacýèna mwà kuvila cyanza cyànyì to. Mèsù ànyì sungasunga kaèna mwà kuvila cyanza cyànyì, anyi dikàsà dyànyì, anyi mwànankàsà wanyì, anyi ní naitùpà kanà cyònsò cyà ku mèmè to. Kaèna mwà kucivila to.

Nènku nànsha muntu mulùme udi citùpà cyà Dîyi dyà Nzambi, anyi mukàjì, kènà mwà kuvila katùpà kàmwè kàà Dîyi dyà Nzambi to. Dìbà adi, nwènù bakàjì, panùdi nwela meeji nè

nudi mwà kwikala nè nsuki mibebula nè kulwa mu Bwikadi bwà Nzambi, nudi bapile. Nudi nucimona anyi? Udi mupile; kwèna mwà kupicila mu Kataacilu kàà Nzambi kùdi mwowèshìibwe nè mâyi à Dìyi to. Dìbà adi udi ubwela mu bwobùmwe. Wèwè udi wela meeji nè ki mùdi, kàdi kwèna mwà kwikala mu bwobùmwe paùdi kùyi mupicile mu Dìyi to, nè katòba kakesè kònsò, Dìyi dikesè dyònsò dyà Nzambi. “Muntu kààkwikala nè mwoyi ànu ku dyàmpà nkààyadi to, kàdi ku Dìyi dyònsò.” Bikèngela cipicile mu ditaaciibwa adi, cipicilamù. Nènku aci cidi cifila mwenya wà muntu mwakàne, bwalu s’ke cidiye ùkèba, ùkèba cintu kampànda bwà kumukezulaci.

¹⁰⁶ Dìyi, Dìyi dyà Nzambi didi Kataacilu kàà muntu udi wela meeji, nè Didi dyènza mwenya wà muntu mwakàne. Tudi bamanyè nè mbulelèlè; cidi citaata cipàtula mpèkaatù wa bupidyà yònsò pambèlu. Kakùcyèna kàbidì dibènga kwitabuuja to paùdi upicila mu Kataacilu aku, bwalu s’ke mwenya mulelèlè wà mwena kwitabuuja.

¹⁰⁷ Mwena kwitabuuja mulelèlè mmuswè kwikala mujaalàme, nànsha byà munyi. Yèyè kèna ànu muswè kwamba nè: “Èè, mèmè’s ndi wa mu milongo yà bantu bònsò ayi. Mèmè ntu wa mu èkèleeziyà, èkèleeziyà udi mutàmbe bunène mu cimenga emu.” Nànsha yèyè mwikàle kaacitanda kakesè mu ditumba, nànsha kaamutàndà kàà nsonà, mwaba kampànda, muntu udi wela meeji mmumanyè nè bìdi bikèngela bwà yèyè kutuutakeena nè Nzambi. Nènku cidi èkèleeziyà wàmba nànsha ciikàle cinyi, anyi cidi muntu mukwàbò kanà yònsò wàmba, bìdi bikèngela bwà yèyè àlwe pa mishingà yà Nzambi. Nènku ngaakwilù wa Nzambi n’Dìyi dyà Nzambi.

“Èè,” mmùdìbo bamba, “‘Dìyi dyà Nzambi.’”

Ncyà bushùwà, bònsò bwàbò bàdi bìitabuuja nè n’Dìyi dyà Nzambi, kàdi wèwè udi mwà kupicilaMù anyi? Mmunyi muwàlekelà mukàji mubèbùle nsuki ùpicilaMù? Mmunyi muwàcyènzà? Mmunyi muwàlekelà muntu kampànda ùpicilaMù wíkala kàyì muswè kushààla mukwàte ku Dilongesha edi? Nwamònu anyi?

Kì mmwenya wà muntu udi wela meeji to. To. Muntu udi wela meeji neèlè meeji, muntu udi wela meeji neèlè meeji misangu yìbìdi kumpàlà kwà yèyè kudyèla mu cintu kampànda cyà bu nànkù awu.

¹⁰⁸ Mònaayi nè, Dìyi adi kadyèna mwà kuDivilaku to. Pa dìbà adi ndisànkìshìibwe, anyi ke dijinga adi. Ke dijinga dyà cinyi? Cidi cikufikishe ku diDijinga ncinyi, ànu kwìnè kwònsò aku? Bwalu munda mwà musùukà wèbè mùvwa dimiinu didyànjila kulongolola divwà Mwoyi wà Cyendèlèlèlè, ùsanganyibwa misangu yònsò ànu munda amu, divwanumù misangu yònsò. “Bònsò bàdi Taatù muMpèeshe nebàlwe kùNdi. Kakwèna nànsha umwe wa kùdìbo wàjimina to.”

109 Mwenya wà muntu udi wela meeji, pàdì muntu udi wela meeji ùmvwa Dîyì dyà Nzambi: “Mikòòkò Yànyì yidi yùmvwa Dîyì Dyànyì, kayààkulonda mwenyi nànsha,” bwalu munda amu mùdì Mwoyi, nè Mwoyi wùdì wùlamakanangana nè Mwoyi.

Mpèkaatu ùdì ùlamakanangana nè mpèkaatù, nènku mpèkaatù ùdì ne mmwènekèlu wa lubombo mu mùshindù wà nè ùdì wèla too nè meeji nè mmusungìdìibwe pèndè kàyì musungìdìibwe to. Ùdì mu ndòndò menemene wa lubombo.

110 Bidimba byà èkèleeziyà mbiswè kataacilu kàà dingumba bwà bààmòna mwà kupeta dijinga dyàbò sungasunga nènku biikàle ànu bàbadiibwa mu mulongo wà bantu “batèndeledi.” Nudi nubùmvwa bàmba nè: “Kaa, yèyè’s mmutèndeledi wa wòò.”

111 Mu Àfrikè, mvwàma dîngà ditùkù, nè bàvwa bààkula bwà eyi, bàmwè bàà ku bàna bàvwa bàyiikila bwà misambu yà bidùndadùndà yìvwà Elvis Presley nè bakwàbò abu bìmba ayi, Pat Boone nè bakwàbò bònsò abu, Ricky Nelson nè bakwàbò bònsò abu. Mémè kwamba nè: “Bòbò’s mmusumbà wa bantu bapidyè diitabuuja.”

Mwànà wa bakàjì mutekète kampànda kwambayè nè: “Mòna’s, yèyè’s mmutèndeledi wa dikèma.”

112 Mémè nè: “S’ki mùvwà pèndè Yudaàsà.” Mémè nè: “Yudaàsà wàkapeta ànu binjànjà byà mfranga makùmi àsàtù cyanààna; Elvis Presley mmupete ndmbu wa mìlìyò yà ndola.” Nwamònu anyi? “Bònsò bwàbò bàkasumbisha makenji à bwanàabuté bwàbò.” Nwamònu anyi? Mémè nè: “Kabèena cîngà cint- . . . dibànza dibiyadibiyàle ditù kacya ditùnga edì dibwèlè.” Cibi ànu, ànu munkaci mwà kushima ànu mùdì kataacilu kàà mfwankà amu, màngumba aa àdi àlekela bidimba abi bibwelamù. Kabìvwa bikèngela mene bwà kwikalabò. . . Bìvwa bikèngela kwikale mukenji wà kabàyi mwà kwimba misambu yà ntèndeleele to. Mbibèngàngàne. . . bìvwa bikèngela kwikalabi bìbèngàngana nè mikenji bwà bòbò kucyènzà’s.

Kàdi cintu cyònsò mu kaabujimà cikaadi cilwè mushikì munène wà beena lubombo, nè mwómò amu ki mùdìbo bàshàala leelù ewu. Kataacilu kalelèl- . . . [Katùpà kàà mukàbà wà mèyi munda mutupù—Muf.] bwà musùùkà, kàdi kàmba nè: “Wèwè munange maalù à pa buloba anyi bintu byà pa buloba, dinanga dyà Nzambi kadyèna nànsha mene munda mwèbè to.”

113 Nwamònu’s, kwènà mwà—kwèna mwà kwamba nè maja à bidùndadùndà àdi à pa buloba. . . anyi ngàà kùdì Nzambi to. Maja à bidùndadùndà àdi à pa buloba. Maja kanà wònsò à ku òwò awu nè mataaciibwe. . . mbintu bibì byà manyaanu’s wè, byòbì biinè, mbyà pa buloba. Ngàà pa buloba ònsò.

Kwèna mwà kwamba nè nsukì mibebula ayi bwà mukaji nyà kwà Nzambi to. Bible ùdì wàmba nè kí nyà kwà Nzambi to, pa nànkù mbukooyà bwà buloba. Nènku wèwè munangè katùpà

kàa maalu à buloba, dinanga dyà Nzambi kadyèna nànsha mene munda mwèbè to. Nwamònu anyi?

¹¹⁴ Ncinyi aci? Èè, cidi cìcìkòka ncinyi? Ncintu kampànda cidi munda amu munkaci mwà kukòka. Musùùkà wùdi wùkòkela ku mushimi wèbè lwà pambèlu, wùpweka wùpìcila mu nymà, wùbwela mu musùùkà. Nènku pìikalà musùùkà munangè maalu à pa buloba, mmufwè. Nànsha cyòci cilaabiibwe mùshindù kaayi, cidi pambèlù *apa*, nànsha cyòci cyakàne mùshindù kaayi pambèlu *apa*; lwà munda *emu* ncifwè. “Bwalu ewu udi munange maalu à pa buloba anyi bintu byà pa buloba, dinanga dyà Nzambi kadyèna nànsha mene munda mwèndè to,” nànsha mwikàle mutèndeledi wa bishi.

¹¹⁵ Kataacilu kalelèlè, mùshindù awu, nekiikale—nekiikale mwà kupàtule bintu byònsò abi kàdi kakàyi kabweja cintu nànsha cimwè to pa kuumusha ànu bulelèlè bwà Nzambi, Dìyì, mu musùùkà mulelèlè menemene.

¹¹⁶ Bàdi bu Èsawù, bwà dimwènèka dyà pambèlu mmwòmò. Èsawù ùvwa mutèndeledi ku mmwènèkelu wa pambèlu. Pàkaadibi bitàngila ntèndeledi, ùvwa ùmwèka mutèndeledi bikolè kutàmba Yakòbò. Ùvwa ùmwèka muntu mulenga menemene kutàmba Yakòbò, kàdi munda mwèndè amu, cìvwàye aci’s. Bwà mmwènèkelu wa pambèlu ùvwa mutèndeledi, kàdi ngeelèlù wèndè wa meeji kàvwa mutaaciibwe to. Kàvwa wèla meeji majaalàme bwà bukenji bwà bwanààbutè to. Yèyè—yèyè kààkeelakù meeji to nè Nzambi, bukenji bwà bwanààbutè bìvwa nè musinga ànu mùvwà Nzambi mubwambè amu to. Ki yèyè awu mwaba awu, wàmba nè: “Ndi nè nzala, bidi nè dishiilangana kaayi bwà bukenji bwà bwanààbutè bwà kale abu? Udi mwà kubùpeta wèwè muswè.” Kaa, ekèlekèle! Nwamònu anyi?

“Ntu nya mu èkèleeziyà; ndi mwìmpè ànu munùdi nwènu amu. Dìngumba dyànyi didi ànu mùdi. . . Mòna’s, didi ànu dimwè dyà ku à matàmbe bunène à pa buloba. Maamù wànyi ùvwa wa mu dyòdi adi’s. Taatù wanyi ùvwa wa mu dyòdi adi’s. *Bikampànda* byònsò, *bikansanga*, nè *bikankènga* abi. Mpaasàtà wanyi ùvwa mulonge tulaasà; ùdi nè *cikampànda*.” Aci’s cidi cimutùma kule menemene nè Nzambi. Aci kī nkataacilu kàa muntu udi wela meeji to.

Bu nè bìvwa nànkù, mmunyi mùvwàku Peetèlò mwà kwikala cìvwàye aci, pèndè kàyi mwà kufùnda dìnà dyèndè yèyè mwinè to? Kàdi yèyè wàkambula Kataacilu kàa muntu udi wela meeji. Mònaayi. Kaa, ekèlekèle!

¹¹⁷ Esawù wàkadyàmbidila nè bukenji bwà bwanààbutè abu kabùvwa nè musinga ùvwà Nzambi mwambe nè ngùdibu naawù awu to. Ki cìvwà dishiilangana pankaci pàà Mwoyi nè lufù ncyòci aci. Nè pa nànkù, ànu bu mùvwà Evà nè bu mùvwà Yudaàsà amu, bààkasumbisha makenji àbò à bwanààbutè bwà disankishiibwa dyà nyòòta yà dimanya dyà dishidimuka. Ki

bwà cyôci aci menemene cyàkasumbishisha Evà makenji èndè à bwanààbutè. Wàkabùsumbisha bwà mwenya mukèsè wà maalu à mamanya, mwenya mukèsè wa dimanya dyà pa buloba, èkèleeziyà mutàmbeku bwìmpè, kasumbù kàà bantu katàmbeku bwìmpè, mmùdìbo mwà kucìbìikila leelù ewu. Nwamònu anyi?

Ki Yudaàsà kusumbishayè makenji èndè à bwanààbutè ku binjànjà byà mfranga makumi àsàtù, nè kupeta ndambù wa ndola misàkidila. “Disangisha dyànyi didi mwà kumfuta bimpè menemene lwà apa, nènku nènyiishilè ànu lwà apa nùnkù.” Nwamònu anyi? “Pa nànkù, mèmè mulwè muyiishi, èè. . .”

¹¹⁸ Bòbò kwamba nè: “Mwanèètù Branham, twètù tudi twitabuuja nè Mukenji awu m’Bulelèlà, kàdi katwèna mwà kuWitaba to. Twètù bacyènzè, mòna’s, tudi bafwànyine kuyiisha penyi?” Huh! Buloba ebu, mwanèètù, s’ki pàrwasà nyèyè awu. Cyà bushùwà’s. “Èè, nànsha umwe wa ku bânà bèètù abu kî mmufwànyìnekù kuntwà nyama ku mikòlò to.” Ncyèna—ncyèna nkèba bwà muntu nànsha umwe wa ku bânà bèètù abu antwè nyama ku mikòlò to. Ndi nkèba bwà Yesù Kilistò àntwè nyama ku mikòlò, bwalu Yèyè wàkaCitwa nyama ku mikòlò. Yèyè ki WàkaCyàmba.

¹¹⁹ Nènku dîbà didi bwanààbutè bulelèlà, Mashi, butaacìibwe kùdì Dìyi; nènku mpèkaatù yònsò, nè maalu à pa buloba, nè èkèleeziyà, nè màngumba, nè tusùmbusumbu, mbishààle pambèlu. Dilonga dyà tulaasà, dishidimuka, èkèleeziyà, dîngumba, ndongolwelu, mpèkaatù wa mishindù yònsò mmushààle pambèlu pàdì muntu udi wela meeji wàngata Kataacilu kàà muntu udi wela meeji, mu ditwà dyà Nzambi mushinga.

¹²⁰ Kakùcyèna cidi cishààlemù to pàdì muntu ùpicishila nsòmbelu wendè—wendè mu Kataacilu kàà Nzambi; mònaayi nè, mwab’ewu nsòmbelu webè ùvwa yònsò musopàkàne nè mpèkaatù, bwalu wèwè uvwa “mulediibwe mu mpèkaatù, mufwimba mu bubì, mulwè pa buloba wenda wakula mashimi.”

Ndi muswè kwamba cintu kampànda, mùvwà Mwanèètù McCullough nè ciibidilu cyà kwamba amu. Ntèlèjaayi.

¹²¹ Pawàkalwà pa buloba ebu, uvwa mulediibwe mu mpèkaatù. Kùvwa nànsha mulwè nè mpùngà wa dilwa nendè bwà kupànda to. Wèwè uvwa “mulediibwe mu mpèkaatù, mufwimba mu bubì, mulwè pa buloba mwikàle wamba mashimi,” munda mwà nyumà webè wèwè mwinè, dijinga dyà mpèkaatù, munangi wa mpèkaatù bwalu uvwa mulediibwe mu mpèkaatù. Kùvwa nè mpùngà nànsha.

Kàdi munda mwèbè amu, mwaba kampànda, ki wèwè ulwàlwa ewu, kùvwa cintu kampànda munda amu cyàkabangà kukòka. Bu wìkala mumanyè, cìvwa ncintu kampànda cyàkakwambila nè kùvwa Nzambi mwaba kampànda; nè wèwè kubala Dìyi Dyèndè. Pashiishe wèwè kwàngata èkèleeziyà,

wèwè kwangata mmwènenenu yàbò pààbò bakwàmbile cìwà citàmbe bwímpè, díbà adi kwàkàkwàta mudimu kacya nè Kataacilu kàà muntu udi wela meeji to. Kàdi paùdi ukwata mudimu nè Kataacilu kàà Nzambì, kàdi kiikàle Kataacilu kàà muntu udi wela meeji, bwalu: “Tutaacilu tukwàbò twònsò netùjiminè, kàdi Kàànyì kakààkujìmina to.” Nènku paùdi wangata Kataacilu kàà Nzambì ne utaata mwoyi wèbè, majinga èbè; wèwè mutaate majinga èbè mu Kataacilu kàà Nzambì, Kataacilu kàà muntu udi wela meeji, kakwèna kùshààla cintu nànsha cìmwè to ànu Nyumà Mwímpè.

¹²² Mpindyewu, wèwè muswè cileeji cyà Nyumà Mwímpè, s'ki cyôci aci. Pìikalà musùùkà wèbè awu mwà kunwàngana nè Dìyì dyà Nzambì, mu cibadi cyònsò, bìdi bìleeja nè udi mupìcishile nsòmbelu wèbè mu Kataacilu kàà muntu udi wela meeji, Kataacilu kàà Nzambì.

¹²³ Mònaayi nè, ki Kataacilu kàà Nzambì aku anyi? Yèyè wàkamba nè: “Tuvwa basukùdìibwe kùdi màyi à Dìyì.”

Nènku pààkapèèshà Nzambì Adàmà nè Evà Kataacilu, mu budimi bwà Edènà, Wàkamba nè: “Kanukòkimù cintu nànsha cìmwè cyà ku byòbì *ebi* to.” Kàdi Sàtaanà wàkatùbulaMù disòsò, kwamba nè: “Kaa, nkantu kakesè, kakààkwenza bibì to.” Anu dimata òmwè cyanàànà, dipìcilamù, ki cyònsò cyàkàkèngediibwà bwà kubweja lufù mu bukwàbantu.

¹²⁴ Ki cyònsò cìdi cìkèngelà, ànu mwenya ndambù wà bulungù bwà mfwanka, bwàbù mbutùùke.

¹²⁵ Kì nkushààle cintu nànsha cìmwè to ànu Nyumà Mwímpè.

¹²⁶ Nènku pashìishe aci cìdi cileeja nè munda mwèbè amu mùvwa òmìinu didyànjlila kulongolola adi munda mwèbè, diikale òkupà nzala yà Nzambì. “Bònsò bàdi Taatù muMpèèshe, mmubaMpèèshe bwà kubàpikula; bààkafwà Naanyì ku Kàlvariyò; bààkabiika Naanyì ku lufù mu dibìikà dyà ku lufù; bònsò bàdiYe muMpèèshe, nebàlwe kùNdi. Nebàtèèkiibwè mu Mubidi awu, mwaba wùdi dikàsà, dibòkò, dyùlù, mukana, cyònsò cìdici aci; nebitèèkiibwèMu. Nè nebàlwe kùNdi mu mìvù yàbò.” Kaa, ekèlekèle!

¹²⁷ Ki ditaciibwa dilelèlè dyà mpèkaatù yònsò wa pa buloba ndyòdi adi, nè ònanga dyà maalu à pa buloba ndifwè, nè musùùkà ewu ùdi ùpwita ànu cintu cìmwèpelè. Ki cyôci eci, kanwìkadi. . . Vùlukààyi! Kanùcìpu mwoyi to. Nwènu bònsò bàdi pambèlu pààpa ku tèlefonè, sòmbeshàayi cintu eci mu meeji ènu. Pàdi muntu udi wela meeji ùbanga kudyàmbidila nè nkumpàlà kwà Nganyì kwikalaye mwà kwimana, nè cìdi Dìyì dyà Nzambì ncinyi; pàdiye ùbanga kwela meeji, díbà adi pàdiye ùpìcilaMù, kakwèna cintu nànsha cìmwè cìdi mwà kufìkàkù to ànu Nyumà Mwímpè.

Ncinyi ciine aci? Ke civuba, òmìinu Dìyì dyà ku cibangidilu, dyà nè wèwè uvwa munda mwà Nzambì ku cibangidilu,

mwimàne kaaba aka ùkòka dimiinu Mwoyi. Dimiinu didi mu mwoyi wèbè, ku didyànjila-kulongolodiibwa. Àlèluuyàh! Dimiinu dikaadimù, ku didyànjila-kumanya dyà Nzambì, didyànjila-kulongolola. Nè pàdidi dikòka, kadyèna mwà kukòkela mu cingà cintu cidì kaciyi Dìyi nànsha.

Nènku dībā adi mmwenya wà muntu udi wela meeji, muntu mwakàne, muntu wa cijila udi umòna Bible awu, nè Yesù Kilstò ùdi umweumwe awu makèèlèlè too nè kashidi. Cidì cibwela mu mwaba awu ncinyi? Dìyi adi, didi mu mwoyi adi's. "Ndi musokòke Dìyi Dyèbè munda mwà mwoyi wànyì, bwà nè ncikwenzèdi mpèkaatù to."

Ncinyi ciine aci, pàdici cipicila mu Dìyi? Kùdi cintu ànu cìmwèpelè cyàpicilà mu Dìyi; n'Nyumà Mwímpè. Ki cintu cìmwèpelè cidì mwà kupicila mu Dìyi ncyòci aci, n'Nyumà Mwímpè. Nè Kataacilu kàà muntu udi wela meeji kàdi kàpèèsha muntu wa cijila mwenya kampàndà.

¹²⁸ Dībā adi, yèyè mmulabùle mwenya wà bintu byà mu Dyulu; ùdi nè Dìyi dyà Nzambì munda mwà mwoyi wèndè. Yèyè ùdi ùDimòna dimwèneshiibwe kumpàlà kwèndè, nè musùukà wèndè mujimà mmuvùngilaMù, nè maalu à pa buloba nè bintu byònsò mbifwè mu nyungulukilu wèndè.

¹²⁹ Kataacilu kàà muntu udi wela meeji, kàà ntèndeelèlu; nè ndi ngèèla meeji ku ditaata dyà ntèndeelèlu mpindyewu. Pàdi Kataacilu kàà muntu udi wela meeji kàfila mwenya wà muntu wa cijila, nwamònu's, Bidi bisànkisha mwenya wèndè. Yèyè ùdi umòna nè Yesù Kilstò ùdi umweumwe awu makèèlèlè, leelù, too nè kashidi. S'ki cyòci aci. TuMumòna ànu kumpàlà kwètù mene, wènza bintu bimwèbimwè byàkenzàYe abi; bidi bisànkisha mwenya wà muntu wa cijila, ngeelèlù wèndè wa meeji.

¹³⁰ Yèyè mmumanyè dībā adi nè ùkaadi muumùke ku lufù muyè ku Mwoyi. Nè yèyè ùtu munange, nè—nè—nè utu munange maalu à pa buloba...bwà kushindikiibwawù, nè muswe bwà Dìyi kushindikiibwa nè kujaadikiibwadi. Mu cikondo nè cikondo cyònsò yèyè ùdi ùCindila, bwalu yèyè mmuntu wa cijila nè ùdi nè dìjinga dyà kumòna Nzambì. Bakwàbò mbaswè ànu kudilamika ku èkèleeziyà. Muntu ewu yèyè mmuswè kumòna Nzambì. Kèna ùMumwènenana mu musumbà wa twitabàayi to. Kèna ùMumwènenana mu bisanji bimpè binèna byà orgues yà nshibà, anyi mu tütèdrale, nè nkùruse mitùmbùke to, anyi balongi bapilùke nè nshingù yàbò yà nkoolò mikùdimuna nànsha. Yèyè kèna ùMumòna mu tèlòjì nè mu mwena tèlòjì kampàndà to. Ùdi ùMumòna mu dishindika dyà Dìyi Dyèndè.

Ndi mMumwènenana mu midilu yà mu bitùùdilu byà bantsentedi.

Mèsù àànyì mmamòne butùmbì bwà dilwa dyà Mukalenge;

Ùdi ùdyata mu cikàminu mùdì tumuma twà
 mvinyò twà ciiji tulamina;
 Wàlekèlèdì mukenyi mukolè wà Mwelè
 Wèndè wà mvità ùdì upita lubilu nè
 ùkwàcishangana bwôwà awu;
 Bulelèlè Bwèndè mbutungùnùke ànu nè
 kwenda kuya. (Nebütungunukè, too nè ku
 ndekeelu. Èyowà's, mukalenge.)

¹³¹ Nudi bamòne cìndi njinga kwamba aci anyi? Kataacilu, muntu... Anyi, Kataacilu kàa muntu udi wela meeji; muntu udi muswè kwimana mu Bwikadi bwà Nzambi. Kataacilu kàa Nzambi kàvwa ncinayi? Dìyi Dyèndè. "Ditùkù diwàkùdyà, ditùkù adi ke diwàfwà." Cidi munkaci mwà kwenzeka kaaba aka nànsha ciikàle cinyi; kùpìcikù Dìyi adi to. "Musukula nè màyi à Dìyi," Kataacilu kàa muntu udi wela meeji. Kí ndingumba to, kí ntwitabàayi to, kí ng'èkèleeziyà to, kí nkatèdralè nànsha; kàdi Kataacilu kàa muntu udi wela meeji, bwalu newikalè mwà kulumbulwishiibwa kùdì Dìyi. Muntu udi wela meeji neèlè meeji awu. Muntu mukùtākane, anyi mwenya wà pa buloba, neàngatè ànu cintu kanà cyònsò eci, mupinganyi. Bwà cinyi mupinganyi pādiku Mulelèlè awu?

¹³² Anji elàayi bì meeji, anji elàngànàpu meeji kakesè. Mukàji kampànda munkaci mwà kwakula mu myakulu, nè nsukì mikòsa nè kapenta ku mishiku, nè pashiishe èkèleeziyà kacya ànu wàshààla mukwàtekù, nè ki cileeeji cyà Nyumà Mwimpè ncyòci aci.

¹³³ Anyi muyiishi kampànda wa ùfùmina mu sèminèrè kampànda anyi mu kàlaasà kampànda kàa Bible, ùkwàta mudìmu nè dibàtiiza dyà ba-trinitaires, anyi ùdya cibàngà nè Dìyi, bwà twitabàayi kampànda anyi òngumba kampànda. Kì Kataacilu kàa muntu udi wela meeji aku anyi? Kì mmùshindù wùndì neimòna to, mwanèètù. Muntu mukùtākane ngudi upicila mu cyòci aci. Neya bushùwà. Nudikù mwà kudifwànyikijila aci anyi? Pamutù pàa kukwàta mudìmu nè Dìyi dyà Nzambi bu Kataacilu bwà musùukà wèndè; ùlekela twitabàayi wa kale awu nè òngumba byènda bìmubàmbidikila panshi mùshindù awu, pamutù pàa kwangata Dìyi dyà Nzambi bu Kataacilu. Nènku díbà adi yèyè yònsò mmutàpile twìshi, nè ùbàlekela bàmfinyika malongesha à bantu munda mwèndè, wènta bintu, "byà bifwànyine kuseeswisha Basungula mene," kàdi mwikàle ùlèngulula Dìyi.

Pèndè, ùvwa mwà kusunyina munda mwà musùukà wèndè mene, ní mùdì cintu kampànda cyà kusunyina. Kàdi pìikalà dimiinu didyànjlila kulongolola adi... Eci kacinùpiciku to. Pìikalà dimiinu didyànjlila kulongolola adi kadìyimù to, kadyàkukòkela Mù to, bwalu necikokè bwà dijinga dyàci.

¹³⁴ Munù wa mfwankà yèyè dijinga nè mwenya wà munù wa

mfwankà, nè yêyè mukwàta mucì ku byanza . . . Ndi ngàmba nè: “Fùba munu wèbè awu,” nènku yêyè kwimana mwaba awu ùfuba munu wèndè awu.

¹³⁵ Mona’s, yêyè’s mmufwànyine kwamba nè: “Aci’s ndikùtakana.” Bwà cinyi? Mwenya wèndè ngwà bulungù. Pa nànkù, yêyè kî mmuntu udi wela meeji to. Nwamònu anyi? Kàdi wèwè udi wamba nè: “Èè, ncyèna, ncyàkulabulakù cintu nànsha cimwè to. Ndi muswè kulabula . . . Ndi muswè kulabula kàpòndà. Ncyèna ndabula cintu kàmpànda to.”

¹³⁶ Mupèèshè mpengèlè wa bilàmbà ùmulekèlè àmulàkè. Nwamònu anyi? Ncyà bushùwà, mulekele àmulàkè’s. Udi wàmba nè: “Ncyèna ngùumvwa mwenya wà cintu nànsha cimwè to.” Cyùdi ucifùbila ncinyi, dìbà adi? Udi dijinga dyà kulabula bulungù bwà mfwankà.

Nènku dìbà dyùdi ulàka twitabàayi wa èkèlezìyà kàmpànda, kàdi nwènu bakàjì nutungunuka ànu nè kubebula nsukì, balaabè bilaabu kwisù, nè biikàle nè mvwàdilu wa usalulangana masandi; nè nwènu balùme nùbàtàngila, nè bintu bikwàbò byònsò ebi, nè nwenza maalu à lukutukutu mu mùshindù unùdi nwenza awu. Ncinyi aci? Ncinyi cidi muntwamu? Maalu à pa buloba àcidi ànumù, nènku nudi nè mwenya. Nudi nucipwita bwà mwenya kàmpànda.

¹³⁷ “Ndi nya ku *ewu* èkèlezìyà; bôbò kabàtu bàtèèla cintu aci to. Kabàtu bàmba cintu nànsha cimwè pa bwalu *ebu* to, cintu nànsha cimwè pa bwalu *abu*. Nànsha cimwè cyà ku bintu ebi kabàtu bàcilengakù to. Wetù muyiishi ngwa lungènyi lwalàbàle kupita alu. Twètù katùtu twamba bintu byà mùshindù awu to.” Ncinyi aci? Udi nè mwenya wà maalu à pa buloba wùdi ufùbilakù awu. Cyà bushùwà’s!

¹³⁸ Kàdi mukàjì udi wela meeji kààkwangatakù cintu cyà mùshindù awu to. Yêyè mmumanyè nè bìdi bikèngela bwà kwikalayè wa cijila. Nè cintu cimwèpelè cyùdiku mwà kupetela ku Dìyi dyà Nzambì n’Nyumà, Bukolè bufùululudi bwà kwenza nè Dìyi Dyòdi diinè, dìdi munda mwèbè adi, diikale nè mwoyi bwà kumwènesha Yesù Kilistò mu cikondo cyùdi nè mwoyi eci. Àlèluuyah! Mwanèètù, aci cyòci kaciyi Bulelèlè to, mèmè ncyèna mumanyè cidi Bulelèlè to. Nkàadi mujimije lungènyi lwànyi pìikalàbi nè aci kî m’Bulelèlè to.

¹³⁹ N’Dìyi Dyòdi diine munda mwà mwoyi wèbè, didyànjila kulongolola mwaba awu, dìdi munkacì mwà kukòka. Nè cidi cipàtula maalu à pa buloba awu; kî nciàswè nànsha. Kàdi pàdici cìfika apa mu Dìyi, cidi cibanga kukòka. Nè pàdici cikòkela mu Dìyi, kaciyèna mwà kwikala cingà cintu to ànu Nyumà Mwimpè bwà kufùululula Dìyi adi.

¹⁴⁰ Dìbà adi Kataacilu kàà muntu udi wela meeji, mutèndeledi n’Dìyi, nè dìdi disànkisha mwenya wà cijila ùdi mu mwoyi wèndè

awu; kataacilu kàà muntu udi wela meeji, mwenya wà muntu wa cijila. Kaa, ekèlekèle, citùdi babwelèmu's wè!

¹⁴¹ Pamutù pàà kukwàta mudimu nè Kataacilu kàà Nzambi bwà musùkà wèndè, ùdi ùlekela Sàtaanà ùmuseeswishila ku dīgumba kampànda anyi ku twitabàayi, ànu menemene mùdi kùmpànyi yà mfwankà wa kàpònda yinùshima nwènù bantu bānwanwà mfwankà. Nudi nwenda nupeta ànu bamambàlà bààbùngi, nènku kwàjiki.

Kaa, ngānji njikijè mu tusunsa tukesè emu, pa kwamba nùnkù.

¹⁴² Laòdikiyà mpofo! Mùshindù mwinè wutùdiku mwà kushààla mpofo's wè! Laòdikiyà mpofo, mulombodi wa bampopo bàà cikondo eci, mwinshì mwà maalu à mashimi, mwinshì mwà twitabàayi yà mashimi, mwinshì mwà bilèlè biswika byà mashimi, mwinshì mwà dīgumba didi diikàle dyà mashimi, mwinshì mwà mikànda yà twitabàayi yà mashimi. Kaa, Laòdikiyà mpofo, munkaci mwà kulombola mpofo, nuyàaya bōnsò batàngile mu mùkidi!

¹⁴³ Shintùlùlà kataacilu kèèbè dilòòlò edi, wèwè muyiishi. Kanùkòkedi bulungù bwà cyena-màngumba abu mu ndongolwelu wenù to, bwà mèyi maswika nè twitabàayi, mùdi Yesù mwambè nè: “Ewu yōnsò wadidīnga kusàkidilaKù mwākù ùmwe awu, anyi kuumushilaKù Dīyi dīmwe.” Panùdi nwambila disangisha dyènù nè mbìmpè bwà bakàji abu kwenzabò bikampànda *abi*, nè bwà balùmè abu kwenzabò bikansanga *abi*, nè bintu byōnsò ebi, *bikansanga* nè *bikankēnga*; pādibo ànu bashààla nè lulamatu ku cyòci *eci* nè bēnza cyòci *aci*, nè bàlama twitabàayi eyi nè bikwàbò, kanwènakù nudyùmva bundù anyi?

“Bafaalèsà bafopo,” mwàkambà Yesù.

¹⁴⁴ Nènku ànu mwà keelà Yesù lubilà nè: “Bàfaalèsà bafopo,” Nyumà Mwìmpè munda mwà mwoyi wànyì dilòòlò edi ùdi wèla lubilà nè: “Laòdikiyà mpofo! Mmisangu bùngi kaayi yìvwà Nzambi muswè kunùpa ditabuluja! Kàdi mpindyewu dībà dyènù dikaadi dikùmbàne; dikaadi dimanè kupita mpindyewu. Mùshindù mwinè ùnùvwà basekè nè beelùwile bantu bàvwà Nzambi munùtùmīnè's wè! Kàdi mpindyewu cikondo cyènù cyakùmbanyi. Kaa, États-Unis, États-Unis, mùshindù mwinè wùvwà Nzambi mwà kwikala mukubwikidije mu mapwapwà mùdi—mùdi cikuka cyà nzòòlo cibwikidija twànà twàci mu mapwapwà, kàdi wèwè kwènà muswè to.” Mpindyewu Dīyi edi didi dyènda dīya kuumukila kuntengu nè kuntengu, dīya ku nord too nè ku sud, nè ku esètè too nè ku wesètè. Mùshindù mwinè ùvwà Nzambi muswè kukubwikidija mù mapwapwa, kàdi wèwè kùyi muswè to! Mpindyewu dībà dyèbè dyakùmbanyi.

¹⁴⁵ Matungà àkaadi àpanduluka. Buloba bùdi munkaci mwà kudishinda. Kilòmèètà binunu bibidi nè nkàmà yinàayi yàbù,

kilòmèètà nkàmà yitaanu anyi yisambòmbò nè makumi ànaayi mu bucyàmà, nebùdiinè mu màyi, lukàmà . . . anyi pàmwàpa mu kilòmèètà makùmi àsambòmbò nè yìnaayi bùbwela mu mutanta munène lwà kuntu kwàka, dimwè dyà ku àdì panshì aa, nè mavwala neàkafikè too nè ku État wa Kentucky. Nènku pàdìbi byènzeka nànkù, necinyukushè buloba bikolè menemene mu mùshindù wà nè cintu cyònsò cìdì pamutù pààbò necidishikè.

¹⁴⁶ Kaa, nsokòkèku mu Lubwebwe lwà bikondo! Nzambì, anyishàku, anyishàku. Ngeelèku mupùyyà pambidi pàanyi, Mukalenge. Nyumà wa Nzambì udi nè mwoyi, ngeelèku mupùyyà pambidi pàanyi. Enzàku bwà ngàngate Kataacilu kàà Nzambì nè ngìkadiè nè mwoyi mwinshì mwàKù, Mukalenge. Lekèla mpuyakanèku lupeepèlè litalàle lwà Nyumà Mwimpè mu bisùlùsùlù byànyi, mu musùukà wànyi ditùkù dyònsò, bwà nè ncikwenzèdì Wèwè mpèkaatù to, Éyi Mukalenge. Ngeelèku mupùyyà pambidi pàanyi, Nyumà Mwimpè, ngeelè mupùyyà pambidi pàanyi! Ndi . . .

¹⁴⁷ Swàkù nkunè Diyì dyà Nzambì munda mwà mwoyi wànyi, nè mpàngadikemu bwà nè ncyà kukùdimuka ku dyàbalùme ànyi ku dyàbakàji, kuya kule nè Dyòdi edi to, kàdi nèngùikalè nè nsòmbelù wa lulamatu ku Dyòdi adi matùkù àanyi wònsò à mwoyi. Éyi Taatù Nzambì, díbà adi mpwekèshilè pambidi pàanyi Nyumà Mwimpè wa Mwoyi, bwà kumfùululwila Méyi awu, bwà ngaamòna mwà kumwènesha Yesù Kilistò kumpàlà kwà aba bàdi kumpàlà kwànyi, bàcikèba bwà kwenzekaci. Ke disambila dyànyi ndyòdi adi.

¹⁴⁸ Kaa, ekèlekèle! Mònaayi mùdìbo bènza leelù ewu mu èkèleeziyà ayi. Bàkòkela bantu ku tutaacilu twà cyena-dingumba atu, bàbàbweja mu nsangilu wa maèkèleeziyà wa buloba bujimà. Bwà cinyi? Bwà cinyi? Bwalu cìdì cibàpèèsha dijinga dyà mwoyi wàbò, bulongolodi. Bàdi nè mwenya wà bulongolodi. Nebàcyènzè.

¹⁴⁹ Musangu wònsò ùvwà Nzambì ùbàtùmina ditabuluja, nènku, bòbò, civwàbò bafwànyine kwenza ncinyi? Bàdi bàdìvwija bulongolodi. Ncyà bushùwà anyi? Pa nànkù bàvwa nè kataacilu kàà wàbò mùshindù, bwalu bàdi nè mwenya munène. Nènku mpindyewu Nzambì neàbàpèèshè dyàbò dijinga dyà mwenya wàbò awu. Yèyè neàbàpèèshe . . . Bàdi bàbàkòkela ànu mu nsangilu wàbò wa maèkèleeziyà wa buloba bujimà awu, nènku díbà adi bàdi bàpeta mwenya wàbò wà cye-dingumba awu. Udi wènda wùbàlwila.

¹⁵⁰ Kaa, èkèleeziyà wa Laòdikiyà, kùseeswishibukù mu eci cikondo to, ku diseeswisha dyàbò adi. Kaa, Mpenta, wèwè ùkaadi mubwele mu Laòdikiyà ewu, wèwè ùdi citùpà cyà Laòdikiyà, èkèleeziyà mufwè awu; ku ba-Méthodistes, ba-Baptistes, nè ba-Presbytériens, ànu mmwènekèlu wa mishingà. Kàdi nwènu beena Mpenta bàvwàku mwà kwamba ku misangu

nè: “amen”; bàdi mwà kwimba mijiki yàbùngi pa cibùmbà cyà ku cyambilu, kàdi biikàle nè bakàji nè nsuki mibebula bàsheeta maja bàtwa eku nè eku mwaba awu, kàdi baciikàle ànu nwitabuuja dyondopa dyà kùdi Nzambi; mmisangu bùngi kaayi mene yìvwà Nzambi mufwànyine kwikala munwangàte, kàdi nwakangata kataacilu kakwàbò, kataacilu kà cyena-màngumba. Mmisangu bùngi kaayi yìvwà Nzambi mujingè kunwàngata nwènù's!

¹⁵¹ Mùshindù mwinè wùvwàbi biseeswishangana's wè! Maatàayi 24.24, Yesù ngwákamba nè...“Bìvwa mwà kuseeswisha nè Basungula mene bu nè bìvwa mwà kwenzeka.” Mùshindù mwinè unùdi pabwìpi's, ànu mùvwà Evà amu, ànu kushiya kantu kàmwè anyi túbidi tukesè tunùvwà kanùyì bafwànyine kwakidila, bwalu nudi badìvwijè bulongolodi kàdi kanùyì mwà kuCyàkidila to. Ki cyònsò cidì cikèngediibwa aci's. Mbipiciibwe nè wèwè mwangàte cintu cyònsò mu kaabujimà nè: “Bwalu kulendwisha mu cidì citàmbe bukesè, ndipiila mu cyònsò.” Kaa!

¹⁵² Mpenta, Mpenta, picishilà ngeelèlù webè wa meeji mu Kataacilu kàà Nzambi, kí mbilòota byèbè byà cyena-màngumba abi to, nènku neùpatukè nè mwenya wà muntu wa cijila, dibàtiiza dilelèlè dyà Nyumà Mwímpè.

¹⁵³ Nudikù mwà kudìfwànyikijila muntu mulùme wetù ewu ùlekela mukàjèndè ùkòsa nsuki yèndè, ùvwàla tùpùtulù, anyi ùvwàla mipanù, kàdi wàmba mùdiye munkaci mwà kupicila mu Kataacilu kàà muntu udi wela meeji anyi? Nudikù mwà kudìfwànyikijila muntu wènza cintu bu nàнку awu anyi?

¹⁵⁴ Nudikù mwà kudìfwànyikijila muyiishi wetù ewu mwimàne mu cyambilu, nè bwalu mmufuciibwe bímpè kùdi disangisha didì dimutuuta tuumapi paanyimà, dimubiikila nè: “Docteur, Mwanèètù, Révérend,” nè dimutwàla ku mafestò à mshindù yònsò mùdi balùme nè bakàji bwòwela màyi pàmwè, nè bikwàbò byònsò, ku myelelu yà mbù; nudikù mwà kudìfwànyikijila muntu ùlaka mukana wàmba mùdiye ùpicila mu Kataacilu kàà muntu udi wela meeji anyi?

¹⁵⁵ Nè bàmwè bàà ku bakàji abu pa cibùmbà cyà ku cyambilu apu, nè nkanzu yàbò mishiikile kumutù kwà binù, yà bwalu ayi mibàlamàte bikolè miikàle yileeja mbungakeenu yònsò, dinyungakana dyònsò didibo bènza, nè bilàmbà byàbò byà mwinshì bimwènekela mu nkanzu yàbò ayi; bibi ànu mùdi kulwata kwà tùpùtulù, bikini, anyi cintu cikwàbò kanà cyònsò eci. Nwènù beena Mpenta, bafofo, bayiishi bàà cyena-Laòdikiyà, Nzambi neànùtwalè ntàntà bule munyi, ncyèna mumanyè to. Ikàlaayiku...Nzambi ikalèku nè luse bwà—bwà mèsù ènù mafofo awu. Yèyè's ùdi nè bwanga bwà kulaaba ku mèsù dilòlò edi, bwà kunùkangula mèsù, bwà nwapeta mwà kumòna.

¹⁵⁶ Ànu mûngămbì mu dîndà emu nè, tudi mu cikondo cyà dimòna, ku lusongo. Kakùcyèna kàbidì byeledi byà meeji muulu kumutù kwà cyòci aci to, byúdi mwà kunyungisha lwà pambèlupambèlù apa to, bwà kumanya. Wêwè, ku dyúlù dyèbè, udi mwà kuumvwa mupùùyà; ku mishikù yèbè, udi mwà kwakula; ku byanza byèbè, udi mwà kulenga nè kwolola cyanza; nè makàsà èbè, nè bikwàbò; kàdi kwèna mwà kuya kule kutàmba mèsù èbè to.

¹⁵⁷ Maalàkì 4 wàfikì; lumònu! “Nè nekwikalè Bukênkè lwà ku ìbaamulòòlò.” Kaa, endèla mu Bukênkè!

Netwèndelè mu Bukênkè, Bukênkè bulenga be,
 Bùdi bùlwa mwaba wùdi mamata à lumuma à
 luse àbàlakana;
 Kenkeshàku mu nyùngulukilu wanyì mwònsò
 muunya nè butùku,
 Yesù, Dìyì, Bukênkè bwà bàà pa buloba.

¹⁵⁸ Èyowà's, mukalenge. Pìcilà mu Bwòbò, kaa, mwanèètù, nènkù neùpatukèmu nè mwenya wà muntu wa cijila, nè Nyumà Mwímpè.

¹⁵⁹ Kaa, mukàjì, pìcishilà wêwè ànu ngeelèlù webè wa meeji wa cyena leelù wa mvwàdilu awu. Pìcishilà ngeelèlù webè wa meeji wa cyena leelù ewu, kumpàlà kwà wêwè kupàtuka mu mùsèèsù kumpàlà kwà bantu balùme; nwènù bansongààkàjì, nwènù bakàjì bakulumpè, kumpàlà kwà wêwè kupàtuka mu mùsèèsù nè bilàmbà byèbè bìdi bitàmbe kukwonya, bikulamate kumpàlà ne paanyimà abi. Ncyèna ndyùla to. Ndi mwanèènù wa balùme. Ndi mwimàne pankaci pàà bàdi nè mwoyi nè bafwè, nè ndi mujingùlùlù cìndi ngàmba aci. Kumpàlà kwà wêwè kupàtuka, nè mumanyè nè mubidi wèbè ngwà mu mulongo wà cijila, anyì cibùcìlu cyà cijila cidi Nzambi mukupèeshe; kumpàlà kwà wêwè kubwela mu mùsèèsù, muvwàle mùshindù awu, pìcishilà meeji èbè mu Kataacilu kàà mukàjì udi wela meeji. Nènkù shààla kuvùlùka, nè: “Ewu yònsò wàkutàngila bwà kukwalakana, ukàadi mumanè kwenda nendè masandi.” Vùlukà aci, mwanèètù wa bakàjì.

¹⁶⁰ Nènkù, mwanèètù, kumpàlà kwà wêwè kukùdimuna mutù bwà kumutàngila, bwà musangu mwibìdi awu, pìcishilà meeji èbè mu Kataacilu kàà muntu udi wela meeji. Neùpatukè nè mwenya wà muntu wa cijila, nwamònu's, bwà kwenza cidi cijaalàme.

¹⁶¹ Mònaayi nè, wêwè mupìcishìle meeji èbè mu Kataacilu kàà mukàjì udi wela meeji, neùpatukè nè mvwàdilu wa mukàjì wa cijila. Ncyà bushùwà. Neùpatukè, mwanèètù wa balùme, nè mmwènèkelu wa muntu wa cijila. Mpindyewu, aci's cidi ànu cintu cimwè cyanààna.

Cintu cyònsò cyùdi wenza, cipìcishìle mu Kataacilu kàà Dìyì dyà Nzambi, ùmonè ní ncimpè anyì cibi.

¹⁶² Neùpatukèmu nè nkanzu wa mukàji wa cijila, nè nsuki mile, muvwàle mvwàdilu wa kalolo; nyumà wa ditalala, mudìpwekèshe; kabìyi byà bàndaayi pwekàayi nè dikòkàngana, nè dilwangana dyà mvità nè maalu à macimbu to. “Nyumà mupòlòbèle, mupòle, udi mwikale bubanji bunène bwà kùdi Nzambi.” Bible ngudi mwâmbè nàнку awu.

Mpindyewu ndi muswè kunùkonkakù cintu kampànda, mu ditùnga dijimà mwàmwa. Netwikalè mwà kwimanyika mu tusunsa tukesè emu.

¹⁶³ Mpindyewu tuyaayaaku twètù bônso, dilòlò edi, tükèketàayi majinga ètù, nèuku díbà adi nudi mwà kumòna mùshindù wà kataacilu kaùdi mupicilemù. Tükèketàayi, muntu nè muntu wa kutùdi, kaaba aka nè mu ditùnga dijimà amu. Kenkètaayi majinga ènù, cinùdi baswè menemene mu nsòmbelu. Kenkètaayi cinùdi nulwila mvità aci. Kenkètaayi cinùdi nulwila kaaba aka. Kenkètaayi cinùdi nuyiila mu èkèleeziyà aci. Ncinyi cidì cikuvwija...Mbimpè bwà kuya mu èkèleeziyà, kàdi kwikadi uya mu èkèleeziyà ànu cyanààna to; aci kacýakukusùngila to. Nwamònu anyi? Anji dikèkète bwà tusunsa tukesè cyanààna, wamba nè: “Kiipàcilà kàanyi nkàà...Nka—nkataacilu kàà mùshindù kaayi kàndi mpicilamù, twamb'eku twamb'eku?”

Nèku wèwè kùyi muswè kukùmbànàngana nè Díyi dyà Nzambi to, nè musùkà wèbè kawùyi wenza nàнку to, díbà adi kùdi cintu cipampàlamùke; bwalu aci cidì cileeja patòòke wèbè mwenya, aci's ki mwoyi...mmwoyi wà mùshindù kaayi ùdi munda mwèbè. Pìikalàwu wà cijila, mudìpòpe, wà kuneemekibwa, newùpatukilè patòòke mùshindù awu. Kabìyi nàнку to, udi nè mwenya mukwàbò munda mwèbè ùdi utaaciibwamù. Ncýà bushùwà menemene.

Nè pìikala mwenya mwikale Díyi dyà Nzambi nè diswa dyà Nzambi, díbà adi udi umanya cidì munda mwèbè, cidì citaata mwenya awu. Bidi bìleeja nè wèwè udi citùpà cyà Díyi adi. Díyi adi didi munda mwèbè, diikale ditacila ku Díyi.

¹⁶⁴ Dìdi muncaci mwà kutaata cinyi? Dìdi munkaci mwà kutaacila mu Díyi, bwalu wèwè udi citùpà cyà Mubidi wà Kilistò wà cikondo eci. Nèuku pìikalà Díyi adi munda mwèbè, Didi mwà kutaacila ànu mu Díyi, Nyumà udi ufùululula Díyi didi munda mwèbè adi awu. Ànu Díyi nkàayadi kadyàkushàala nè mwoyi to. Ki bwà cinyi: “Bônso bàdi Taatù muMpèeshe nebàlwe kùNdi; nè Mémè mubàndishìibwe muulu, Nènkòkè bantu bônso kùNdi.” Nwamònu anyi? Nwamònu's, “Taatu,” citùpà cyà Mubidi wà Kilistò cidì pa buloba, cidýànjiila kulongolola, citèeka mu mwoyi.

¹⁶⁵ Muntu kanà yònsò udi mwena Kilistò mulelèlè ewu, mulediibwe cyàkàbìdi leelù ewu ewu, mmumanyè, kacya ànu pàcivwàye mwànà mutekète, anyi nànsha, mwànà mukèsè wa bakàji, nè kùvwa cintu kampànda munda mwèbè amu cìvwà

nè nzala yà Nzambì. Kàdi wàkateeta bwà kushààla wa mu maèkèleeziyà nè bikwàbò byònsò; kàbivwa mwà kukùmbana to. Cìvwa ncinyi? Cìvwa n'Dìyi adi. Wèwè uvwa wenda ukèbangana nè Kataacilu. Nènku dǐngà ditùkù Dyòdi kupenya kumpàlà kwèbè; wèwè kumòna Yesù Kilistò umweumwe awu makèèlèlè, leelù, too nè kashidi. Aci cyàkasànkisha mwenya. Nwamònu anyi?

Bwalu, mwoyi wùvwa munda mwèbè, wùkòka. Nwamònu's, mwoyi ùdi munda mwèbè wùdi wùkòka. Wùdi—wùdi wàmba cidi dijinga dyùdi naadi kaaba aka. Wèwè udi munkaci mwà kukòka. Kwèna mwà kukòkiibwa mu *cikampànda*, nè *cikansanga* to, nè *cikankènga*. Bikèngela ùsanganè Kataacilu kajaalàme aku, bwalu wèwè udi muntu udi wela meeji. Nwamònu anyi?

¹⁶⁶ Pawikalà muntu udi wela meeji, udi mudyànjila kulongolola, anyi mutaata kumpàlà kwà . . . kumpàlà kwà difùkà dyà dyulu nè buloba.

¹⁶⁷ Nènku mwambi wa cyena màngumba yèyè mùmvwà cyòci eci, ndi ntèkemena nè yèyè ùdi wàngata Kataacilu kàà muntu udi wela meeji, pìikalàye mwambi wa mu dǐngumba. Pashìshe neimanshè dibùki dyà cyena-dǐngumba didi cyà bushùwà menemene nè cyà kubùtuka adi, bwalu ndiyi dyà muntu; nè kwitabayè Dìyi dyà Nzambi ditaaciibwe didi kashidi kadiyi mwà kupangila anyi kupita, nè nedikùmbanangane nè mwenyi wà muntu wa cijila. Nènku, ànu mùvwà Yakòbò, neàlekelè maalu ònsò à pa buloba nè nzala yà dǐngumba dyònsò anyi luumù, bidì bisanganyiibwa pa buloba abi biya, mwaba ùdi wèwè mwà kwikala mwèpiskòpò, kardinalè, nànsha wèwè mwà kwikala mukùlù mutàngidi wa ditùnga dijimà, anyi mpaasàtà wa èkèleeziyà kampànda munène. Neùlekelè byònsò bidiku abi biya. Kabiyi bu mùvwà Esawù to, bwà kushààla citùpà cyà buloba; kàdi ànu mùvwà Yakòbò, neùfilè byònsò byùdi naabi bwà kupeta bukenji bwà bwanààbutè, Kataacilu kàà muntu udi wela meeji aku; bwalu neKàkupèeshè mwenya wà muntu wa cijila. Nè neKàkusànkishè. Nè nekàsankishiibwè, nè nekàsàntwishiibwe nè mwenya wà Cyendèlèlèlè wà bwìmpè bwà Nzambì.

¹⁶⁸ Vùlukàayi nè, Sàtaanà wàkatùbula disòsò dyàkumpàla mu meeji à Evà, anyi ngeelèlù wendè wa meeji, bwà kulekela mwenya wa lungènyi lwèndè nè dimanya bìbwelelamù.

¹⁶⁹ Mpindyewu elàayi meeji ku bwalu ebu. Nkàadi njikija. Sàtaanà wàkatùbulamù disòsò dyàkumpàla, bwalu cyònsò cìvwaye mwà kusuna cìvwa ànu Dìyi. Aci's cìvwa n'Nyumà ku Dìyi dyà Nzambì, bwalu wàkamba nè: "Paùdi ànu upuuyakeenyina mu Kataacilu aka, kwàdyàkufwàku to; kàdi wèwè mwangacile mupuuyakeenu wa cyòci eci lwà pambèlu *apa*, neùfwe." Nwamònu anyi?

170 Ki Sàtaanà kwamba nè: “Kàdi kwèna mumanyè kantu nànsha kàmwè kaaba *aka* to. Kàdi labula kakesè kàa ku cyôci eci *apa*, nènku díbà adi neùmanyè; newikalè bu mùdi Nzambì amu. Nwamònu’s, Yèyè mmumanyè maalu mîmpè nè maalu mabi; wèwè kwèna mumanyè to. Nènku bu wèwè ànu mwà kulabulakù ndambù mukesè wa ku cyôci *eci*.” Ki mukàji kumulekelayè ùtùbulamù disòsò, ànu kaadisòsò kakesè kàmwè cyanààna.

171 Mpindyewu nudi numòna bwà cinyi ndi ngàmba. . . Nwènu nudi nwamba nè: “Bwà cinyi kùyikù ulongesha bakàji, nè bikwàbò, mwà kupeta mapà nè bintu byà mùshindù awu?”

172 Mémè nè: “Mmunyi mùdi mwà kubàlongesha makumi makolè pàdibò kabàyi baswè kuyiila ABC?”

Byàkakèngela ànu kasòsò kakesè kàmwèpelè cyanààna. Yèyè kwangata lungènyi lwà pa buloba, nènku, pàakenzeka aci, cyàkatèeka lufù mu díkù dijimà, bàkeba bwà kulabula lungènyi.

173 Mpindyewu tàngilàayi kataacilu, mu bushùwà bwà bwalu kàdi kaleeja patòoke wèndè mwenya. Mwenya wèndè ùwà bwà byà pa buloba; s’ki cyàkapetaye aci. Ke cidici leelù ewu aci’s. Mbanange maalu à pa buloba nè bintu byà pa buloba, nè cimwènekelu cyà difwàna dyà Nzambì, kàdi biikàle bàvila Bukolè bwàdi. Nwamònu’s, Sàtaanà neàbàlekèle bàakula mu myakulu; neàbàlekele beela mbilà; neàbàlekèle bènza masangisha à dyondopa dyà kùdi Nzambì; yèyè nèàbàlekèle bènza bintu byà mishindù yònsò ebi.

174 Yèyè ùdi wàmba nè: “Bààbùngi nebàlwe kùNdi mu ditùkù adi, nè: ‘Mukalenge, mémè ewu ncitukù mwipàte baadémons anyi, ncyènakù mwenze bintu byàbùngi, mwenze *cikampànda* anyi?’” Yèyè neàmbe nè: “Ncivwa nànsha mukumanyè to, wèwè mwena mudimu wa bubì.” Pàvwà Dìyi ditèèkìibwe ànu kumpàla kwèbè kàdi wèwè mutùngùnùke ànu nè kupwita kataacilu kàa kale kàa maalu à pa buloba aku, nwamònu’s, bìdi bileeja mwenya ùwà mu mwoyi.

175 Nkuci kayèna mwà kudyà munyiinyi mubolè to. Kayèna mwà kuwùdya to. Kayèna nè kanyònga to. Cikòlòlò cidi mwà kudyà dimiinu bu nkuci nè cidi mwà kudyà cintu cibolè bu mùdi cikòlòlò, nwamònu’s, bwalu cyôci ncyena lubombo. Kàdi nkuci yèyè kî mmwibaka mùdi nyuunyi mukwàbò kanà yònsò ewu to, nènku ke bwà cinyi Nzambì WàkaDilleeja bu Nkuci ùpweka ùfùmina mu Dyulu. Nwamònu anyi? Kèna mwà—kèna mwà kutwàla mupùyyà mubolè wà cintu cibolè aci to. Kî nciminyi to; kabingilâ nkàa nè, yèyè kènà nè kanyònga to. Kènà mwà kubitaata to. Mbifwànyine kumushipa, bu yèyè mwà kubidya.

Nè nkuci mene kàtu ùkèngela kwowa màyi nànsha. Mubidi wà nkuci ùtu ùpàtula màfutà ùmukila munda, àdi àmulama mukezùke. Mmwoyi ùdi munda mwà nkuci awu; ùdi ùpàtula munda mwèndè màfutà àdi àlama masàlà èndè makezùke.

ku Dìyì nè ku Dìyì, diikàlè nè mwoyi.” Dìbà adi kùdi mwenya wà Mwoyi wà Cyendèlèlèlè wùdi muswè awu’s.

Nènku paùdi weyela mu Dyòdi adi, ncinyi cidi mwà kulwila mu Dyòdi adi, Kataacilu kàà Nzambi anyi? Kí ncíngà cintu to ànu Nyumà nkààyendè; kamùyì byà pa buloba, nànsha kakesè; bupidyà nànsha bùmwe, nànsha kakesè. Nkataacilu kàà Nzambi. Nènku paùdi upuuyakeena mu Dyòdi adi, kakwèna cintu nànsha cimwè cidi mwà kupicila mu Dyòdi adi to ànu Nyumà Mwímpè.

¹⁸² Mpindyewu wèwè udi nè cileeji cyà Nyumà Mwímpè, nwamònu’s, mwenya wà mulùmè anyi mukàji wa cijila. Mbaswè kwikala nè mwoyi. Bàkaadi nè Mwoyi wà Cyendèlèlèlè. Nènku bwalu Dìyì edi ndifùlùlùdiibwe kùdìbo, bàdi nè mwoyi; Kataacilu kàà muntu udi wela meeji, nè mwenya wà muntu wa cijila.

¹⁸³ Kanwàngaci maalu à pa buloba to, mùdi byapù byà mfwankà abi, ku diseeswisha, kàdi kwangata Kataacilu kàà muntu mulelèlè udi wela meeji. Kutaata mweyelu ùdi weyela, cyàkudyà cyùdi udyà, cintu cyònsò cyùdi aci; ucyèyela mu Dìyì dyà Nzambi, nènku neùpete mwenya wà muntu wa cijila. Bwalu, neDipatulè cyòci aci, bwalu Yèyè ùdi umweumwe awu makèlèlèlè, leelù, too nè kashidi.

¹⁸⁴ Nènku ndi mumanyè nè, nànsha twètù biikàlè anyi katùyì . . . Ndi ngìtabuuja nè tudi nànkù. Kàdi, twètù katùyì nànkù to, kùdi muntu kampànda pa buloba leelù ewu udi citùpà cyà Mubidi wà Kilstò; nè Dyòdi nediikale nè mwoyi ànu ku Dìyì dyà Nzambi, Dìyì dyònsò didi dipàtukà mukana mwà Nzambi bwà cikondo citùdi nè mwoyi mpindyewu eci.

¹⁸⁵ Nè ncyèna mwà kumòna nè mpenyi pàdi dìngumba . . . Méyì awu bitòoke tòò mu Bible, mmwàmbè nè necyenzekè, nè bintu bìvwà mwà kwikalakù, kàdi’s ki twètù aba nè mwoyi mpindyewu mene mu byòbì. Ncyèna mwà kumòna nè nkwèpi kùdici cifwànyine kwikala cìngà cintu pa kuumusha ànu eci.

¹⁸⁶ Èkèleeziyà, ndi mfika ku dyumvwa nè bìdi bìkèngela bwà mèmè kwimana pàmwe neenù mu Cilumbulwidi dīngà ditùkù. Kabyenzekikù bwà mèmè kunùlondela cintu kampànda cyà cibi to, bwà dimanyika. Ncyèna muswè aci to. Bu nè mvwa nè dijinga dyànyì, mvwa mufwànyine, ànu dijinga dyànyì dyà buntu, mvwa mufwànyine kwangata cingoma cyànyì cyà kàlibrè aci kuya mu diitu nè kudiibakila kazùbu kàà mici, ne kutèya, matùkù àànyì ónsò à mwoyi. Nkàadi ngènda nkùlakaja, mucyòke, muzengèle, nè mucibùlùke, kàdi nciyi mwà kulekela to. Kùdi cintu kampànda munda mwànyì emu, ciikale cìpela. Dyàkabi dyànyì mèmè nciyi ngàmbe Bulelèlè nè Bulelèlè bwònsò mu kaabujimà to. Dyàkabi dyànyì mèmè nciyi mwimàne kaaba aka to too ne pàdi mweyelu wà ndekeelu wà mubidi wànyì ùnguumuka. Ndi nè cyà kwimana, nciyi ntàngila cidi muntu

mukwàbò kanà yònsò wàmba to. Ndi mwambùle bujitu kumpàlà kwà Nzambi.

¹⁸⁷ Nè mèmè ndi cyà bushùwà ngiitabuuja nè bintu bitùdi tuyiisha bìdi Bulelèlà. Kí nè mbwalu mèmè ngudi ubiyiisha to. To, mwanèètù wa balùme. To, mukalenge. Nzambi mmumanyè mwoyi wànyì. Mùshindù mwinè ûndì njinga bwà kwikala musòmbe mu batèèleji nè kutèèleja diyiisha dilaaba. Mùshindù mwinè ùdibi mwà kwikala bipeepèle bwànyì mèmè, ncyà bushùwà menemene bwalu ndi mufwànyine kupeta Mwoyi wà Cyendèlèlè ànu mùdi muntu udi mu cyambilu awu. Ndi citùpà Cyàwù ànu mùshindù wùmwèwùmwè ùdiye yéyè awu. Ndi mwà kuya mu Dyulu òmwèdimwè adi, kwikala nè dyèsè òmwèdimwè adi. Mùshindù mwinè ùdibi bifwànyine kwikala bipeepèlè bwà mèmè kusòmba pambèlu pààpa nè kubenga kwangata ditàpiibwa, dituucilbwa, nè lukutukutu. Nebiikalè bitàmbe kupeepela mùshindù kaayi's, bwà kwikala pambèlu apu butùkù bujimà kakùyi tulù, dîbà dijimà nè citùpà, anyì mèbà àbidi; ndwangana mvità yà bibula butùkù bujimà nè bintu bìdi bijuuke. Nebiikalè bitàmbe kupeepela bishi bwà mèmè kwenza cyòci aci, kwambula cingoma cyànyì pàdibu bùcyà, mukoolo wànyì wà ndòbo, nè kuya kalòba anyì kazomba's! Mùshindù mwinè ùdibi bifwànyine kwikala bipeepèlè's wè! Mwanèètù, mbwalu buungiimikila. Nzambi àngambùlwishèku bwà nciikadi ngàlekela kaaba kàànyì kàà mudimu nànsha, kàdi ngààshààla nè lulamatu nè bulelèlà, nè kunùtwàdila Kataacilu kàà muntu udi wela meeji kàànùpèèsha mwenya wà muntu wa cijila.

¹⁸⁸ Kataacilu kàà muntu udi wela meeji aku's ke màyi, màyi à ditàpulula. Ndikezudiibwa dyà ku mpèkaatù, didì Dìyi dyà Nzambi adi. Nènku muntu udi wela meeji, muntu udi mumanyè nè bìdi bikèngela bwà kwimanayè kumpàlà kwà Nzambi awu, mmumanyè nè bìdi bikèngela bwà yéyè kwandamuna ku Dìyi dyònsò dyà Bible, Dyòdi adi nedisankishè mwenya ùdi mu mwoyi wèbè awu. Nzambi àtwàmbùlwishèku bwà kuMupeta, patùdi twinyika mitù yètù apa.

¹⁸⁹ Nzambi munanga, dîbà dikwàbò dijimà ànyì àbidi ààpicì. Ntankù mmunyungùlùke mpindyewu. Mukenji mpindyewu wùdi ùshààla mu maalu-malonda, nè mMufùnda pa Mukànda. Bidi bikèngela bwà twètù bònsò kwandamuna mpindyewu bwà bwalu ebu, dinyungakana dyònsò ditùdi bènzè, dîyi dyònsò ditùvwà bàmbe, meeji ònsò àvwà mapàtùke mu mutù wètù, mukàbà ùcidi ànu munkaci mwà kunyunguluka. Nè wòwò newùtùngunukè nè kunyunguluka too nè pààjika mwoyi, nè pashìshe netwàndamunè mu Ditùkù dyà Cilumbulwidi.

¹⁹⁰ Éyi Nzambi, Mufùki munène wa maulu nè buloba, Utùdi twitabuuja cyà bushùwà ewu, ndi ndòmba bwà cisàmbà eci ditùkù edi. Ndi ndòmba bwà mèmè mwinè pàmwè naabò, bwà Mukalenge Yesù, bwà Ùlamè Kataacilu Kèèbè. Nènku mèmè ngamba cintu kampànda cyà cinyangakaja cijila, Mukalenge,

ndi...munda mwà mwoyi wànyì ncyèna mucimanyè to. Ndi ndòmba bwà nè byòbì bibi bwà mèmè kwangata Diyì Dyèbè nè kukwàta mudimu nè cintu bu nàнку awu, Ùmfwilèku luse bwà bwalu abu.

¹⁹¹ Kàdi, Mukalenge, mvwa ndyàmbidila pa Ùvwà wakula naanyì mu diitu amu nè, Wèwè udi mumanyè dībà mu dindà amu, kacivwakù ànu mwà kungumuka mu meeji to. Mvwa mucitàbe bu cintu cyùmukila kÙdi. Pa nàнку, Taatù Nzambi, nkàadi mumanè kucyàkula. Nènku ndi ndòmba, Nzambi, bwà Wèwè kucilekela cibwela mu mùshindù wùmvwa mèmè mwelè meeji nè ke wùdibi awu, bwà nè muntu udi wela meeji, muntu yèyè nè ngeelèlù wetù wa meeji ewu, neàmanyè nè ùdi nè cyà kwimana mu Bwikadi bwà Nzambi, nè kènà mwà kubweja mu musùùkà wèndè cintu nànsha cimwè cidi citàpa twìshì anyì cibèngangana nè Diyì dyà Nzambi to.

¹⁹² Nènku, Taatù, tudi bامanyè nè, pàndi mucifwànyikije nè malongolodi à leelù aa; kabìyi bwà kupangakanangana to, Mukalenge. Wèwè neùndumbùlwishè, dīngà ditùkù, byùmukila mu mwoyi wànyì. Nènku ndi ndòmba, Nzambi, bwà Ùmonè nè kacivwa nè cyà kwikala cishìilàngàne to, kàdi civwa nè cyà kwikala cyà meeji matòoke, bwà kuteeta kwikala nè meeji matòoke, bu mùndi mumanyè nè ndi mukwàte cintu cisumba ku Mashì Èbè, kuumukila ku mwelelu wà mbù too ne ku mukwàbò, mpindyewu mene, mu cyanza cyànyì emu. Nè bààbùngì bàà kùdìbo mbiitàbùùje Mulubù.

¹⁹³ Nènku, Nzambi wa mu Dyulu, swàkù bwà kakwikadikù nànsha umwe wa kùdìbo mujimine to. Ndi mbànana, muntu nè muntu, nè nshààla mulame kumpàlà kwàbò Kataacilu kàà ku mpèkaatù, Mâyì à ditàpulula, Mashì à Yesù Kilistò, Diyì divwijìibwe mubidi. Enzàku nàнку, Mukalenge. Nè swàkù bwà Nyumà Mwìmpè àpongololè mulayi wònsò, mu misùùkà yètù. Nè swàkù bwà twikalèku baleeji bàà mpàlà bàdi nè mwoyi bàà Mukàjì-musèla wa Yesù Kilistò, mu cikondo cyà mèsù, cyà dimòna dyà mu Bukènkè bwà dilòòlò, bwalu tudi tuKuleejaci mu Dìna dyà Yesù Kilistò. Amen.

¹⁹⁴ Nudi baMunangè anyì? [Disangisha didi dyamba nè: “Amen.”—Muf.] Nudi nuCìitabuuja anyì? [“Amen.”] Mèmè, bu mèmè mwà kwamba cintu kampànda cyà cibi, mu kwamba kwà nè: “kataacilu kàà muntu udi wela meeji,” ncyenà ne cikwàbò cyà kwamba to. Ncyèna nè kàlaasà kalonga to. Bikèngela ànu ngàmbe cidi cimvwilà. Pàmvwà mucimòne citèeka panshì kuntwaku, mèmè è kudyàmbidila nè: “Elu ndubombo lwa mùshindù kaayi elu’s wè!”

Ke Cintu kampànda kwambaci nè: “Ànu mùdi èkèleeziyà amu.”

¹⁹⁵ Kataacilu kàà muntu udi wela meeji! Kaa, ekèlekèle! S’kùdi byàbùngì kutàmba aci mu cyòci’s. Muntu udi wela meeji kì

mmufwànyìnèkù kukwàta naaci mudimu to nànsha kakesè. Nwamònu anyi? Nànsha kakesè. Nènku cidi cijinga mwenya wa munù wa mfwankà, ncyà bushùwà, bwalu bìdi bikèngela ikale naawù bwà kusànkishayè wèndè mwenya. Kàdi muntu mulelèlè, udi wela meeji nè mumanyè nè musuùkà wèndè wùyaaya ku Cilumbulwidi, neàtaacilè wèndè mwenya mu Dìyi dyà Nzambi. “Bwalu bônso bàdi Taatù muMpèèshe nebàlwe kùNdi.” Nè yèyè neikalè nè mwoyi ku Dìyi dyónso didi dipàtuka mukana mwà Nzambi, didi Màyi à ditàpulula àdi àtùtàpulula nè mpèkaatù. Bwalu, pàdici cipìcila mu Dìyi, tudi tumòna nè mmpèkaatù bwà kubènga kuDìitabuuja, pa nàнку tudi tuDìitàbùùja ànu cyanàànà nè tutùngunuka. Nditàpuluka nè mpèkaatù. Nudi baMunangè anyi? [Disangisha didi dyàmba nè: “Amen.”—Muf.]

Ndi muMunangè, ndi munangè. . .

Twèlààyi ànu byanza byètù muulu cyanàànà mpindyewu kùdìYe.

Bwalu Yèyè wàkannanga kumpalà
Nè wàkampetela lupàndu
Ku mucì wà Kàlvariyo.

¹⁹⁶ CyàkambàYe ncinyi? “Ku eci bantu bônso nebàmanyè nè nudi bayiidi Bàanyi, panùdi banangè, biikàle nè dinanga muntu nè mukwèndè.” Mpindyewu tùlabulanganàayi ku cyanza nè muntu kampànda patùdi tuwimba cyàkàbìdi apa, twamba nè: “Ndi mukunangè, wèwè pèèbè, mwanèètù.”

Ndi muMunangè, ndi. . . (Eci mbwà
kunumanyisha nè. . .)
. . . Yèyè wàkannanga kumpalà
Nè wàkampetela lupàndu
Ku mucì wà Kàlvariyo.

¹⁹⁷ Mpindyewu, nudi baswè Kataacilu kàà muntu udi wela meeji anyi? [Disangisha didi dyàmba nè: “Amen.”—Muf.] Paùdi uya mu mùsèèsù bwà kutwilangana nè bàà pa buloba màalabà, mwanèètù wa balùme, mwanèètù wa bakàji, udi nè Kataacilu kàà muntu udi wela meeji aku anyi? Pàdi muntu awu ùkubiikila nè mmunsantu mubùnguluki wa mu malaba, udi ukwàta mudimu nè Kataacilu kàà muntu udi wela meeji anyi? Pàdi muntu kampànda awu wàmba cintu cibì bwèbè wèwè, udi nè Kataacilu kàà muntu udi wela meeji anyi? Nwamònu’s, alùjà bwìmpè ku bubì. Sambidilà aba bàdi bàkudyombola, nè aba bàdi bàkukèngeshà, dìbà adi udi weyela mu Kataacilu kàà muntu udi wela meeji.

¹⁹⁸ Bwalu panwikalà nunanga ànu aba bàdi banùnange, bu mutùdi balabùlangàne ku byanza muntu nè mukwèndè emu, bu bânà bèètù bananga mu Mukalenge, abi’s mbìmpè, kàdi nudikù kàbìdi mwà kunanga bàdi kabàyi mwà kunangiibwa abu anyi? S’ki Kataacilu kàà muntu udi wela meeji nkòkò aku. S’ki Nyumà wa Kilistò munda mwèbè, ùnanga aba bàdi kabàyi bakunangè,

dìbà adi udi upeta difutu dyà Nzambì. Kàdi, mpindyewu, wêwè ucyènza bu mudimu, kwèna ànu mwànji kupeta muntu udi wela meeji awu to. . . Udi wêwè ànu mu cijengu ciibìdì. Kàdi mbifùmina munda mwà mwoyi wèbè mùdì mumunange cyà bushùwà, dìbà adi udi upuuyakeena mu Kataacilu kàà muntu udi wela meeji. Nè Kàdi kàsànkisha mwenya wà muntu wa cijila, mu mùshindù wà wêwè kumanya, byumùkila munda mwà mwoyi wèbè nè udi ufwila muntu nè muntu luse, nè bikwàbò byònsò, cìdì cyenzèke nànsha ciikàle cinyì. Yèyè kí mmulenga wa dikèma anyì?

. . . wàkannanga kumpàlà
Nè wàkampetela lupàndu
Ku mucì wà Kàlvariyo.

Netwèndelè mu Bukênkè, M'Bukênkè bulenga be,
Bùdi bùlwa mwaba wùdì mamata à lumuma à luse àbàlakana;
Kenkèshàku mu nyùngulukilu wetù mwònsò muunya nè butùkù,
Yesù, Bukênkè bwà bàà pa buloba.

Netwèndelè mu Bukênkè ebu, M'Bukênkè bulenga be;
Nè Bùdi bùlwa mwaba wùdì mamata mataata à luse àbàlakana;
Kaa, kenkèshàku mu nyùngulukilu wetù mwònsò muunya nè butùkù,
Yesù, Bukênkè bwà bàà pa buloba.

Lwâyì, nwènu bònsò bansantu bàà Bukênkè, kòbolàâyì nè,
Yesù, Bukênkè bwà bàà pa buloba;
Dìbà adi ngonga yà mu Dyulu neyìdilè,
Yesù, Bukênkè bwà bàà pa buloba.

Kaa, netwèndelè mu Bukênkè, M'Bukênkè bulenga be;
Bùdi bùlwa mwaba wùdì mamata à lumuma à luse àbàlakana;
Kaa, kenkèshàku mu nyùngulukilu wetù mwònsò muunya nè butùkù,
Yesù, Bukênkè bwà bàà pa buloba. (Nudi banangè aci anyì?)

Kaa, netwèndelè mu Bukênkè ebu, M'Bukênkè bulenga be;
Nè Bùdi bùlwa mwaba wùdì mamata à lumuma à luse àbàlakana;
Kenkèshàku mu nyùngulukilu wetù mwònsò muunya nè butùkù,

N’Yesù, Bukênkè bwà bàà pa buloba. (Ndi ànu munange aci’s!)

Diitabuuja dyànyì nditàngìle Kùdì,
Wèwè Mwànà wa mùkòòkò wà ku Kàlvariyo,
Éyì Musungidi wa kùdì Nzambi;
Mpindyewu ngumvwilèku pàndì nsambila apa,
Uumùshà mpèkaatù wanyì ônsò . . .

Ntaatèku, Mukalenge, ku Dìyì adi.

Éyì anyishàku bwà kuumukila ku leelù ewu
Mémè yònsò ngiikalè ànu Webè!

Anjì elààyibì meeji ku cintu aci, mutaata mu Dìyì, “Wèbè yònsò mu kaabujimà.”

Pàndì ngendela mu nyongolo wa mîdimà wa
njila mibwelàkàne wa pànwapa apa,
Nè pàdì lutàtù lùpaasalala lunnyungulukile,
Wèwè ikàla Mulombodi wanyì;
Tùminà mîdimà dîyì bwà yàndamuke muunya,
Kupula bwôwà bwà tunyinganyinga,
Kùndekediku mpàmbuka
Nya kule nè luseke Lwèbè nànsha.

[Mwanèètù Branham ùdi wimbila mu matàma *Diitabuuja Dyànyì Nditàngìle Kùdì*—Muf.]

. . .ku mwoyi wànyì wùdì wàmba kwimana
ewu,
Sonsòlàku lukunukunu lwànyì;
Kaa, tùminà mîdimà dîyì bwà yàndàmukè
muunya,
Nèè kùpulàku binsònjì byà tunyinganyina,
Éyì anyishàku bwà kuumukila ku leelù ewu
Mémè yònsò ngiikalè ànu Webè!

199 Nzambi munanga, tudi banangè ku Kwimbila, bwalu mwômò amu ki mutùdì twelela njiyà yètù patòòke, disaluka dyètù, disangisha dijimà, pa Ùdì utùpwìdijila mupùùyà wà Dìyì dyà Mwoyi apa. Tudi nè kusàkidila kwàbûngì, Mukalenge. Nè musambu awu, twàkìdìlèku, nwWanyishèku anyi, Mukalenge? Ke dijinga dyètù ndyòdì adi, ndyà kushintuludii bwa mu Dìyì dyà Nzambi, kwendela ditùkù dyònsò mu Bukênkè, Bukênkè bwà Èvànjeeliyò.

Nè ùjaaku njila wètù ditùkù dyònsò nè
dinanga,
Patùdì twenda nè Nkuci wa mu Dyulu apa;
Tùyaayi bònsò musangu ùmwè, nè musambu nè
mimwemwe,
Ûjà njila wetù ditùkù dyònsò nè dinanga.

²⁰⁰ Enzàku nàнку, Mukalenge. Tùbènèshèku pàmwè mpindyewu. Ngàsà Webè nè luse biikalèku neetù. Ondòpàku babèèdi nè beena ntàtu mu ditùngà dijimà.

²⁰¹ Tudi tuKusàkidila bwà Mwanèètù Coggins dilòòlò edi, mùdi Wèwè mumulekèle mupàtùke mu lùpitaadi, bwà àlukilè kumbèlu musàngàle. Twasàkidila bwà bintu byònsò byŪdi mwenzè, nè bwà dikàndà dyètù sungasunga ditùdi tudyùmvwà bambùlùke mpindyewu edi.

²⁰² Tudi tuKusàkidila bwà kaaDiyiisha kakesè kakòsòlòke dilòòlò edi, Mukalenge. Ncyèna—ncyèna mudyènzè mu mùshindù mujaalàme to, kàdi ndi ndòmba, Mukalenge, bwà Wèwè kudìvwaija dijaalàme ku mèsù kwà bantu, bwà bàmonè nè bàmanyè civwàci ciswa kwamba. Petèlamu butumbi, Mukalenge, nè swàkù bwà tùpetèku dyumvwà edi, piikalàku kakùyì cintu cikwàbò nànsha cimwè, dyà nè tudi nè cyà kwikala nè mwoyi ànu ku Dyâmpà dyà Dìyì dyà Nzambi, ditaata difùmina kùdi Nzambi ànu bwà bânà Bèndè nkàâyabò. Ndisangisha ditàpùlùke. Kì ndyà muntu kampànda nànsha umwe to. Dìdi ànu bwà aba, basungula Bèèbè, ànu mùvwà mâyi à ditàpuluka à lukùngùlù lwà ngombe miikale ànu bwà disangisha dyà Izalèèlà nkàâyadi. Nàнку, Taatù, tudi bamanyè nè Dyâmpà didi ànu bwà Mikòòkò nkàâyayi.

“Kì mbìmpè bwà mèmè kwangata màmpà à bânà kàdi kuèlela tubwà nànsha,” mmwàkambà Yesù.

Ki mukàjì awu, kumupingajila, kwambayè nè: “Èyowà’s, Mukalenge, aci’s ncilelèlà, kàdi ndi muswè kwangata tusùnsùkila atu.”

Nèнку tudi tudyùmvwà mùshindù awu dilòòlò edi, Mukalenge. Tudi baswè byònsò byŪdi mwà kutùpèèsha abi, Taatù, bwalu tudi nè nzala nè nyòòtà Yèbè yàbùngì.

²⁰³ Enzàku bwà nè nzala yètù yùkucishiibwè nè majinga ètù àmanyishiibwè, bwalu, Taatù, tudi baswè kwikala nè dijinga dyà muntu mwakàne. Nè Muntu mwakàne awu úvwà n’Yesù Kilistò, nè dijinga Dyèndè divwà dyà kwenza diswa dyà Taatù, divwà Dìyì. Enzàku nàнку bwètù twètù, Taatù. Tudi tulòmba nùнку mu Dìnà Dyèndè. Amen.

Tùjuukilàayaaku kuulu mpindyewu patùdi twimba musambu wètù wà ditangalajangana naawù wà nè *Angàtà Dìnà Dyà Yesù Wèndè Naadi apa.*

²⁰⁴ Mu myaba yònsò mpindyewu, mwômò mùkaadi Mukenji muyè dilòòlò edi amu, Nzambi ikalè neenù mpindyewu patùkaadi tutangalaja mu disambila apa. Yònsò wa kunùdi, pambèlu apu, ndi ntèkemena nè nudi basànke bikolè mu kutèèleja ànu mùmvwà musanke mu dinùtwàdilaDì amu. Kàdi ndi nè dyeyemena dyà nè Nzambi neàDitèèke mu mwoyi yènù nè kunùpèèsha dyumvwija dyàdi dijaalàme.

205 Nè nwênù bàdì mu batèèleji emu aba bàdì nè mishwalà eyi mitèèka kaaba aka, mèmè ndi muyitentèkèle byanza. Ndi ndòmba bwà Nzambi òndopèku muntu nè muntu wa kunùdì, kakwikadikù mubèèdì nànsha umwe munkaci mwètù to, nudi numòna mùdì Nzambi wetù wàndamuna ku disambila's.

206 Patùdì tudisangisha pàmwè: “Bantu bàdì babiikidìibwe ku Dìna Dyànyì nebàdisangìshè nè nebàsambile, dîbà adi Mèmè nèntèèlejè mu Dyulu.” Yèyè ngwàkalaya bwà kucyènza.

207 Pa nàнку, katwèna bakòsòlòke to. Tudi ànu Mupèrsonà umwèpelè; tudi bònso umwe, mu Kilistò Yesù. Nènku muntu nè muntu mwikàle ùsambidila muntu nè muntu; nùnsambidila pàndì nnùsambidila apa. Nènku Nzambi ànùbènèshè too nè patwànùmòna cyàkàbidì.

208 Nè ndi mutwìshìibwe nè nenwikalè dîbà dyònsò . . .nwênù bàdì basòmbèle lwà pabwìpi apa abu, nenùlwe ku tabernacle bwà kukùmbulakù mpaasàtà wètù mwìmpè, Mwanèètù Neville. Yèyè neànwenzèlè bìmpè, Mwanèètù Mann nè bantu bìmpè bàdìbo naabò mu tabernacle emu aba.

209 Panwikalà pabwìpi nè Mwanèètù Junior Jackson anyi bàmwè bàà kùdìbo mu ditùnga dijimà emu, mu New York nè mu myaba mishìilèshìilàngàne mùdìbo benzela masangisha àbò, lwà mu Arizona mujimà nè mu Californie mwònsò amu, kùmbulàayikù maèkèleeziyà awu panwikalè bapàtùke bayè muntwamu. Tudi tulòmba bwà nwênù kwalukìla cyàkàbidì nè kulekela bwà mpaasàtà ànwambùlwishèku bwà kumanya bitàmbidile pa bwalu bwà Mukalenge Yesù.

210 Nzambi ànùbènèshè mpindyewu patùdì twimba nè *Angàtà Dìna Dyà Yesù Wèndè Naadì apa.*

. . . Dìna dyà Yesù wèndè naadì,
Mwànà wa kanyinganyinga nè dikènga;
Nedikupè disànka nè busàmbi, (Ciwenza
ncinyì . . . ? Yèyè neàkutèèkè pa . . . ? . . .)

. . . ùye.

Dìna dyà mushinga mukolè, (Dìna dyà
mushinga mukolè!) Éyi dyà bupòle be!
(Éyi dyà bupòle be!)

Ditèkemena dyà buloba nè disànka dyà Dyulu;
Dìna dyà mushinga mukolè, Éyi dyà bupòle be!
Ditèkemena dyà buloba nè disànka dyà Dyulu.

211 Pàndì nkenketa disangisha dilòlò edi, mmòna Mwanèètù Estle Beeler paanyimà pààpa, Mwanèètù Palmer, nè bààbùngì, Mwanèètù J. T., nè bambi bùngibù biimàne banyungulukile mwaba ewu, ncyèna mwà kutèèla mènà abo bwònsò to. Mwà njinga kwikala, yònsò wa kunùdì, mwab'ewu, nè bònso bwènù kutangalaja disangisha anyi kwenza cintu kampànda. Nudi nuumvwa's, kì mmwòmò anyi? Ndi mumanyè nè nudi nè mwoyi

wà bwena Kilistò nè mumanyè nè bìdi bikèngela bwà... mutùdi—mutùdi emu; tudi bõnsò Mupèrsònà umwèpelè, mu Kilistò Yesù.

²¹² Mpindyewu tùvùlukàayi citùminyi cìdi cìlonda eci patùdi tuwimba apa, pàdi Mwanèètù Martin ewu ùtùtangalaja mu disambila apa. Nènku ndi muswè bwà... Ewu's m'Mwanèètù Earl Martin wa ku, ngèèla meeji, wa ku Arkansas anyi—anyi ku Missouri. [Mwanèètù Earl Martin ùdi wamba nè: "Missouri."—Muf.] Missouri, ànu lwà ku mikàlu yà Arkansas nè Missouri aku. Bàdi nè èkèleeziyà kuntwaku.

²¹³ Nènku ndi mumòne mwanèètù mukwàbò ewu wa kwinshì kwàka, ncyèna mwà kuvùluka dìnà dyèndè to, Brewer. Yéye ùvwa kaaba aka mu dindà emu. Ngèèla meeji nè ùcidi ànu kaaba aka dilòlò edi. Éyowà, ndi mmumòna mwimàne lwà kaaba aka, Mwanèètù Brewer. Mvwa mulayè bwà kulwa nè kubanjija maèkèleeziyà abò, kùkaadi misangu yàbùngi. Nènkakùfikè dīngà ditùkù, ku dikwàcisha dyà Mukalenge, mūndi mwà kufika amu.

Mpindyewu, patùdi twimba citùminyi cìdi cìlondà mpindyewu apa:

Twinamina Dìnà dyà Yesù,
Tupòna mikookwela ku makàsà Èndè,
Mfùmù wa bamfùmù mu Dyulu netùMwàsè
cifulu cyà butùmbi,
Pààjika lwendu lwètù.

Tùwĩmbàayi mpindyewu.

Twinamina Dìnà dyà Yesù,
Tupòna mikookwela ku makàsà Èndè,
Mfùmù wa bamfùmù mu Dyulu netùMwàsè
cifulu cyà butùmbi,
Pààjikà lwendu lwètù.

Dìnà dyà mushinga mukolè, (Dìnà dyà
mushinga mukolè!) Éyì dyà bupòle be!
(Éyì dyà bupòle be!)

Ditèkemena dyà buloba nè disànka dyà Dyulu;
Dìnà dyà mushinga mukolè, Éyì dyà bupòle be!
Ditèkemena dyà buloba nè disànka dyà Dyulu.

Kaa, angàtà Dìnà dyà Yesù wèndè naadi,
Bu Ngabu ku butèyi bwònsò; (Tèèlejàayi
mpindyewu.)

Kaa, pààkujìngilà mateeciibwa ku nseke nè ku
nseke, (Udi nè cyà kwenza cinyi?)

Nungana ànu cyanààna Dìnà dyà cijila adi mu
disambila.

Dìnà dyà mushinga mukolè, Éyì dyà bupòle be!
Ditèkemena dyà buloba nè disànka dyà Dyulu;

Dîna dyà musinga mukolè, Éyì dyà bupòle be!
Ditèkemena dyà buloba nè disànkà dyà Dyulu.

Twìnyikàâyì mitù yètù.

Kaa, Dîna dyà musinga mukolè, Éyì dyà
bupòle be!

Ditèkemena dyà buloba nè disànkà dyà Dyulu;
Dîna dyà musinga mukolè, (BabàtìjìbweMù;
tusambila mu Dyôdì) Éyì dyà bupòle be!

Ditèkemena dyà buloba nè disànkà dyà Dyulu.

Mwanèètù Martin. [Mwanèètù Martin ùdi ùsambila—Muf.]



65-0822E Kataacilu Kàà Muntu Udi Wela Meeji
Branham Tabernacle
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org